

國

朝

文

匯

國朝文匯乙集目錄

卷二十二

趙

佑

字啟人號鹿泉浙江仁和人乾隆壬申進士官至左都御史有清獻堂集

濮鎮紀聞叙

舊雨草堂詩序

書張蔭堂治行續張府君傳後

書書永清張乞人事後

李貞孝本末紀

敖山記

署知衡水縣徐君冢傳

周

正

字季和號方山山東安邱人

睦處士故里碑

四川提督威信公岳公傳

翁方綱

字正三號覃溪順天大興人乾隆壬申進士官內閣學士左遠鴻臚寺卿有復初齋文集

養生論

擬師說一

十一

擬師說二

十二

陳白沙先生集序

十三

黃仲則悔存詩鈔序

十四

漱芳西室記

十四

洪節母傳

十五

惺齋王先生墓誌銘

十五

戴國程先生墓誌銘

十六

梁同書

字元穎號山舟浙江錢塘人乾隆壬申進士官翰林院侍講嘉慶丁卯重宴鹿鳴恩加侍講學士有頻巖庵集

翟晴江先生傳

十八

吳一峯小傳

十八

大同府知府雪履袁君墓誌銘

十九

黃達

字上之江蘇華亭人乾隆壬申進士官隴安府教授有一樓集

王陵論

二十一

韓侯祠記

二十一

遊晚甘園記

二十一

姜孝子傳

二十二

川沙同知鮑公墓誌銘

二十二

葉忠節公墓表

二十三

國朝文匯乙集卷二十二

濮鎮紀聞叙

趙佑

合天下古今之大而舉其星野山川封域建置沿革人官物產外薄四裔圖之說之網之目之以立萬世之監戒資上下之稽省曰一統志由一統志析而各直省曰通志由通志析而為郡州志由郡州析而縣志小矣其由郡州縣析之志一山志一水抑又小矣然而有大焉或亘數千百里界數十郡數郡最小數十里為之志者因而極其繇歷之長包絡之廣以著其大而矜吾才雖其小亦崇侈言之至于就一縣之中析之為一鄉一鎮其小尚不足當縣一隅則直不足以較小大也雖極崇侈言之無當也且夫省志郡州縣志上而統志皆責之在官開館局集經費合數十人之多數十年數年之久而始一成成既歷年或旋即于廢闕而有待唯其大是以難也而于區區一鄉鎮何有則又唯其不足較小大也易而置之也大而難既莫適舉小而易又以為不足舉將孰是舉者乎吾以為識大由小始識大難識小尤難尤小則尤難何也大可以旁羅衆有而極其崇侈之量小則局促易盡也然而大必待諸官小則人皆可勉要各視其人之才才大者構無小譬若一几牖之供而可以備山林之曠興發墨尺幅間而百千里吐納具焉則吾于桐鄉胡孝廉琢之為濮鎮紀聞得之

桐子吾浙縣之一也。濮又其鎮之一也。無高山廣澤奇特之觀。其地介三邑。截十里。其人利織作。競錐刀。往往詩書之房。而虞見聞之固。去而游于都會。以求進。誠自量其不足。較小大也。則習而安之。胡君獨有所不安焉者。以為地無小。吾非敗大吾小。將進吾濮之人。游于大焉。則無或置其小。于是採蒐故實。即童時之釣遊。質父老之談助。斷自宋南渡濮氏來遷。稱濮院為立鎮始。稍推及宋以上。備紀元明逮今。分建置人物記傳風詩為四門。先之總叙。殿以雜識。合六卷。以追前人濮溪志。草檇李稗編諸作。而加抉擇焉。其尤致意于水利倉賑義學諸大姓之盛衰風俗之滄澆。至于一善不遺。訛傳必正。期以備監戒稽省。不言志。然古作志才也。使徒以較諸省志。郡州縣志。猶是一勺之分。江而片壤之移岱也。奚論尤大者。然而小之不得矣。非必崇侈以為言也。未嘗局促而易盡也。於乎。斯吾之所以為難。且尤難者乎。

舊雨草堂詩序

平原董寄廬口吃而心達。貌儉而神王。境畲而道豐。自其少日。以春柳詩擅場。識者謂與王文簡公秋柳詩嗣響。壯而掉鞅文壇。聲滿京國間。及年四十餘。始通籍。旋由詞館改外。避之始授江西小邑。僅一年。歸東東昌郡。鐸者十年。以老疾自謝去。一子早喪。比方送其孫入貢太學。與諸同人重理三十年出處情話。皆咨嗟相慰勞。夫寄

廬所處境天若以之處他人亦稱有成就矣而於寄廬不可謂非數奇也然察寄廬之意並出其詩讀之儻然自寫其生平之蘊藉有得於南北閱歷之多而神仙令僕未足加吾素也激昂而不怒跌宕而不淫戲不為虐正不入迂遠有會近有喻淺而淺深而深洵哉今之有道力人也伊昔言詩動謂窮而益工殆激於世之達者不必工而徒以炫其工於是孤憤著書之流日以多而詩之道替矣乃若三百篇正風雅頌皆古公卿大夫黼黻雍容之作而唐宋迄今以顯名厚實見於時者何限豈得郊島獨為工而燕許憾不窮哉如文簡之於詩尤寄廬所嘗辯香而奉者也吾方歎寄廬之以工窮而豈期寄廬之以窮工以寄廬之詩之工而不免於窮寄廬之窮之不足以及窮寄廬之詩斯則寄廬之所為寄廬而嗣響文簡不虛耳詩裁八卷先有宛平黃崑園先生為之序茲寄廬新定刊本重以屬余暨翁覃溪學士覃溪執古人書不兩序為別題二集句於卷而專就余余見宛平之題在甲戌上元則猶寄廬同館以前作而後此廿餘年所未及也序之以續宛平有不覺其長言之不足云

書張陰堂治行續張府君傳後

讀武功張誠齋府君行狀暨墓表至其臨終誠子之言曰爾弗薄民當如吾弗薄爾使民不薄爾始見爾不薄吾旨哉何其重以周也世之稱民父母者知推已慈子之

心以及于民。未必知推其親慈已之心。以及于民。知慈之宜推。而不知即孝之所以全也。夫民也以薄施。則亦以薄報。上下交相薄。則交相賊。禍且百端。而有不及于其親。以傷其慈者乎。則反是。而不有及于其親。以完其孝者乎。府君言其格言。而令子蔭堂君能成之。殆慈與孝兩無憾者矣。余與府君蔭堂君。初不相識。歲辛丑十二月。余奉命視學山東。則蔭堂由清平案移嶧縣。已歷年所。是時東省歲歉頻。又鄰河患。徵發時作。窮民無知。或相抗撓。而諸生往往連厯其中。甚乃陷首禍。議者咸以士習壞。余既嚴檄諭誡之。所至咨察恐後。始接見蔭堂。則獨振聲言曰。民未有無故為抗者也。況士乎。民。吾子也。士。吾子之才者也。胥役則僕豎倫也。父母之愛眾子。常不如其愛才子。其愛婢僕。又不如其愛子。必也子之事父母。而無敢輕訶撻其側之人。以抗父母。必也。然而僕豎朝夕給事吾側。而子恆疏。子或將藉以達情于吾。而不得。吾又未必事事宜吾子。輒信所不可信。以病吾子。謂吾子皆不才。獨僕豎才。甯有是乎。玉樹以為子無不可教。在不使其與吾疏。而有以得其情。不使僕豎得中之而已。他日又曰。王之親吾民。由士始。若成人。若小子。擇其才而時進之。居之以善地。導之以正業。勤之以可喜。馴之以不苛。因以勸其餘。未見民之有異情也。余敬聽而亟稱之。既而校量案牘之數。嶧獨希。越甲辰。車駕東南巡。四月。旋蹕自南。予與省垣

諸公皆至嶧祇候迎送時道近被旱久二麥且不登獨嶧百里間橋梁道路無不整古蹟若荀況祠以下無不舉男女包黍飯往來城鄉者趾相接也詰之皆曰吾父母之食吾也自正月于茲矣諸公既嘉設法之豫而怪其不以聞君則曰待請晚矣且分內事又幸眾力足辦可無聞也于是益相與數異不置而君且以失察逃犯墨議期六月當罷職會膠州牧缺撫軍為力請于上竟以授君順輿望昭公道也去嶧之日士民涕泣通道以萬數有徒而從之膠者膠之人則又有聞而匿之他者膠視嶧尤繁廩賈廛商船之所湊利數甲二東君至無所妄取興治之一如在嶧時明年檄署濟甯直隸州裁數月而却陋規平物賈理積訟民以稱便比去亦如去嶧時又明年嶧大饑司救者不如法民盼盼益思前父母乃復檄君攝賑事然後安君之初至膠也諸生趙節者篤行通經工詩文王夏亦工詩皆年踰四十過蹇而貧余始識拔焉節居距州六十里君特造訪之節以憂謝不可竟白衣冠見為之開設義學延以師禮其他激厲裁抑無不備至膠之文學由是蒸蒸矣是皆余在東五年所目擊而耳熟者君洵可謂不薄其民民亦洵不薄君顧獨不識君之皆自不薄其親推之及得讀君所為尊府君狀今韓城相國所為表而後悉君本末惟誠齋府君之教孝以為慈而陰堂之體慈以成孝也夫府君以經生老而卒能教其子以及于民君所

為成其親志以及民者。知必不獨區區一州邑間。府君生平學行。自表狀外。又有傳有記。表章綦備。吾獨歎夫世之爭相為薄。而不知薄于民之即為薄于親也。又歎蔭堂君之日周旋于簿中。而幸以完其所不薄也。不厭縷書之。以附府君傳後。留為他日光撫軍者。明興公。今刑部侍郎。同時方伯為陸公懋。終湖南巡撫。臬使為馮公晉祚。於乎。其可以觀矣夫。

書書永清張乞人事後

嘉善周震榮。字永清。嘗書張乞人事。張乞人。永清縣南門外貧民也。父歿。行乞養母。止無廬舍。穴土為居。會天大雪。知縣魏繼齊過其處。聞歌聲出地中。怪之。左右曰。張乞人也。呼出問之。奮曰。今日我母生辰。歌以勸餐耳。命車載其母子至官廨。繼齊母餽其母大布及粟。繼齊餽乞人錢十緡。乞人叩頭曰。官母賜我母。不敢不受。官賜我。我不敢受。繼齊曰。與其殘杯冷炙。日夕沿門也。奮曰。殘杯冷炙。我母安之久矣。且無所污也。我愚民不知此十緡。官何所受之。我母年八十。我年六十有一。為官清白百姓足矣。繼齊慚汗下。不復強授焉。為營室于城內金花巷。將命居之。乞人負其母去。不知所終。于是仁和老友趙佑讀而為書其後云。

乞而孝。難已。乞而廉。尤難。觀張乞人之受官母賜。不受官賜。其真視萬鍾猶嘖蹴哉。

惟孝故能廉。不廉不成其為孝也。雖然乞人以乞養母。官以官養母。官母之賜乞母。何莫非官之有所受以安其母。乞人特推其安母之心以重官母。亦善為官地也。官盡徐者其向所受之果克安母。母之安之亦如乞母乎。則無獨為乞人難也。則猶幸此一官之知慚也。

李貞孝本末紀

予既論祝貞女事。因滋有感于李貞孝事。不憚瑣紀之。李貞孝者。予故同年友海甯李家勳字紹衣未婚婦也。姓楊氏。父某監生。母某氏。生二子一女。即貞孝。獨以端慧愛之。家世殷富。而李族貧。居袁化里。賃種監生田。恆不給租入。監生性褊急。頗重文。一日躬下田。見童子赤腳供饁。資格清秀。問之。即李翁子家勳也。九歲矣。異而勸之學。使入所立義塾。中資給之。數年。讀五經畢。以應縣試第一。監生喜。欲妻之。妻若子。恚曰。是老顧。甯患女無家。而棄諸他人乎。乃館生于家。偕其次子學。積不合。生年十五入泮時。女年十四。監生來李翁踵門謝。袖女庚帖示之。遽出女與生拜于庭。眾愕然。不及阻。既定。監生亟營營具甥舍。期一舉成禮。顧連不得志。家人日相靳薄。女忍之。父竟以致疾不起。而婚期益眇矣。于時動已二十外。性倜儻。不羈好游。學日進。游益廣。出入無時。一夕連呼鑑。無應者。女自帷數之曰。丈夫不自處高明。何依人。

受慢為生故識女聲大警悟徑出門不顧女初不意生之不復顧也乾隆庚午勳年二十六領鄉舉女母兄將擇吉生獨以不官不娶辭而北留滯又數年越甲戌始考補內廷教習益發憤忽得咯血症卒年止三十信聞女知母兄且有他議欲自引決屢矣既而思徒死無益乃泣告母曰李郎所以不歸而死者皆女故也感深矣願暫容持服待其喪還一臨奠懺悔已然後聽所為耳母信焉比觀至女哭迎諸郊倉卒要母以歸李不可則又泣告母曰壻為女死而翁姑老且瞽無別子女欲得當以報九原也母誠愛女與其迫之嫁而死曷若縱之歸而生女閨中所有皆父賜唯母與兄命之足給養勿女慮矣皆不得已許之廟見卒哭朝夕起居于舅姑一切經紀操持如禮于是內外矜式之咸相呼曰貞姑曰孝婦而李貞孝之名達城鄉矣貞孝性婉順而用心沈毅其委折有非丈夫能到者莫大于為翁納媵一事嘗請于姑曰婦所賴以守者子也今族中鮮可繼盍選侍天幸生小叔待其長而生子即婦有子不虛耳已而姑歿遂大斥所有成其事時翁且七十果生男德茂二歲而繼室又歿乃躬撫教之翁壽幾八十替忽聞親睹晚子之嘻嘻十齡道命呼姪娘笑而瞑翁平居見貞孝必起拜必命曰非但吾德若吾先世咸賴若之繼絕也是皆子于乙未丙申間同年張君起鳳周君壽並袁化人次第詳告予相歎為非常信天之必報之

不可無文以表章之者。第未審後何似。越數年則聞德茂已婚生子。貞孝已得旌矣。又數年聞子上學矣。貞孝蓋于乾隆五十四年已酉。壽六十有四。守貞三十六年。事翁歷二十一年。以其坊價佐兩世葬畢而後終。信苦志竟成而天之不爽如此。以視祝貞女彼以齋恨。此以壽考數則不齋其歸一也。然吾聞貞孝當請坊曰。敘事蹟與張周兩君言詳略先後頗異。又不及為翁納媵有子事。前州戴致曾作志亦失實。使奇節大美幾湮不彰。則甚矣子文之不可以已也。或又曰。州志稱貞孝姓徐氏。楊蓋誤。姑第勿深攷云。

教山記

由沂州西北經蒙陰至泰安。皆山行。出蒙陰西關望輒見一峯銳聳于眾山之前。如簪如筍。如椎髻如蓬。隨升降隱見。轉側異態。蒼翠欲滴。與徂來新甫相掩映爭奇。者教山也。即魯語所謂具敖。今俗謂之青雲山矣。屬新泰縣治東十五里。距蒙陰西四十里。山後曰教陰。前曰教陽。直官道有市集。土色紅膩。環究沂泰三郡多同。所謂徐州厥土赤埴者。山戴石皆緞色。體似華不注。而東西加長。多削壁危巖。礧礧岬岬。有洞小而遙。志謂之雲霞洞。蓋雲霞之所常出。其木宜松柏檜栝。龍葱萬株。多莫知何年植。山半至巔皆有廟。上不十里。陡仄無盤道。唯樵子道人夷視之。山西麓廟曰

字澤。以祀山神曰溥靈侯。志稱禱雨有應。土屋數間多頽缺。予以甲辰二月偕進士陸廷樞四庫書錄金溪。自北教陽取道數里。一及其陞瞻望小憩不忍去。數日。昔晉范獻子聘魯。問其教焉。是必當時久擅名。魯人富以不知。又曰。先君之諱抑宜已有更易耶。以閱于今二千餘年。又近在大道旁。豈無名流好事登臨留刻其中。而傳述絕少。志乘復荒略不備。至并其實若存若沒。雖以予三人往來睇眄。慕其奇秀。非一昔亦復慙濟勝無具。其徒為山靈之嘲笑者何限。是不可無記。以為山牘。是夕宿新泰會邑令江君將有志于修舉。言其治有青雲書院。因為改正院額。而并識之。具山志稱在東郡十里。即山之近西小石山。俗謂之金斗山者。是凡齊魯山川皆處處有正名。見于傳記圖經可考。而妄濶于道途。忙隸之口者。良不勝慨也。

署知衡水縣徐君家傳

士有負才氣。謹步履。重然諾。修之家以信于友。及試之功名之塗。而連蹇不足以自遂。幸有可遂而旋得旋喪。不知者得以成敗短長其人。即不然而精力既半。摧于前日連蹇之中。往往設施未就而病寢隨之。居無幾何以死。此君子所致慨于命之不一齊者也。若徐君星槎其一已。星槎少樹文譽。有大志。不屑屑篆刻俳優之學。讀書砥行。躬秉諒直。善事父母。為諸弟先。與人樂易。無猜。獨重氣誼。而惡勢利。一介未嘗苟

性不能容人過稍不合輒微諸詞色。有急則寒暑就之。竭忠謀如在己。善飲。每酒酣耳熱談古今得失事。慷慨激發。無少假借。漸不覺其聲氣之盛。人疑其醉已而裁決。瑣屑露如也。舉乾隆十七年壬申。恩科鄉試。時年三十六。越甲戌始游京師。留滯者數科。從未嘗輕半刺有所干謁。亦不應諸雜試。與歸安鄭步雲葉佩孫。杭州趙佑。最相友善。文章道義。切劘無間。先後居停不踰三子所。嘗歎謂時方鄧隆而士傲。苟得拙者弊章句。巧者規形勢。不立身何以致用。故獨厚自刻厲。介然于內外本末之間。匪求異俗。而標置自遠。厯壬辰年五十六矣。再與大挑。以一等發直隸試用。始謝場屋。單車出都門。至則制府以下。交器其才。謂此文學吏。不可苛以奔走。會詔求遺書。環畿輔以學獻者數百種。悉屬君校勘真贋。而後進。又使蒐訪所在金石藝文。得古碑版數通。多元明人考錄所未及者。以為快。甲午冬。題署冀州衡水縣事。明年春疾作。數月未得告。告未及替。而疾不可為矣。實乾隆四十年乙未七月二十五日也。壽至五十有九。惜哉。君體素強。能耐寒暑。佐其父綜理家政。惟勤惟儉。南北屢遷。攜一僕善醉。從不督過之。病或躬藥餌之。自辛巳秋。丁母吳孺人艱。歸得咯血症。時時作止。初至保陽。聞槽糠不祿。血傷懷抱。懼違嚴侍。宦情日以減。病日以滋。癸巳春車駕謁。

泰陵君奉文分治蹕道稱善迎送之次蒙遣侍衛問職名去尋加一級上官由是益加期許君亦行自勉以圖報塞其在衛也自蒞任至移疾不過十月而卹不成之偏災修久廢之水利捐資至數百緡上下稱便病猶力親案牘夫以君之才之學充君之志斷斷當不止于是而可表見者已如是向使得蚤表見于十年二十年之前或更假之年以觀其後于以奏循績躋大用亦復何加于君而乃試之遽奪之遽也豈非命哉豈非命哉君本姓滿氏系出吳諸葛瑾後以避難改為滿明有漏坦之以文學名其宗也徐則自七世祖某公用外家姓登第仕至尚書子孫相承莫能復違為徐氏世居紹興山陰黃石里父曰泰德始遷湖州德清之新市家焉君鄉薦時著籍猶稱山陰學生久之始改從所選定為德清人諱士龍字荀若星槎號也配徐氏雖同姓在源本異有淑德其詳具君自為行略中子一健雲諸生孫一元曾君之病也健雲來省父于官舍至是將以喪歸因奉君狀乞其執友趙佑為之傳以備家乘焉

叙曰佑與星槎定交二十年悉君族里為人言行大節較備不待狀也健雲書述君病革時猶惓惓予不置君傳非予誰誣者顧維十數年間事君母歿而予為之傳徐孺人歿為之諱今復以傳君何君家之多故而予友道之窮且重予之憾也始予嘗

從容規君。以徐娶徐。為異日臨丈之嫌。曷若喜曹姓。復祖姓。君深韙之。而未暇及。蓋亦將貽其後之人之善繼矣夫。

睦處士故里碑

周正

高邑睦處士。字季邵。聘不仕。事具魏書逸士傳中。蓋表於義而隱者也。世以為沈溺泉石謬矣。魏司徒崔浩。必欲聘起處士。意至切。浩學貫百家。為一時名儒。而惓惓於處士。則處士所學可知。韜玉不沽。果人情與。或疑處士與浩少莫逆。是不屑為故人中。即耳觀浩之敬憚處士。雖歷以爵將。與講布衣昆弟好。必不屈以掾曹禮。處士夫豈不知浩者。當攷本傳。載處士父遠為慕容廆中書令。嗚呼。此可以得處士之心矣。燕滅於拓拔氏。而處士父為燕大臣。處士以父志為志。其不仕魏。殆與靖節之不仕宋等。處士對浩辭氣頗倨。至呼其小字。蓋欲激怒浩。為可決絕。而浩終始愛敬。必有微喻其意者。處士不望天下之知之也。其絕浩至不啻其書。然浩被誅。為素服受鄉人弔。使為其中郎。更受深恩。報之當何如。當浩得君漸驕恣。已伏禍機。處士不輕以身許友。猶之不負故君之義耳。世人讀陶詩。即無不知有靖節。而處士所著書。皆已散佚。無從窺其學問。後人幸生其地。僅得過里居。以想見其為人。邑西門外有闕帝廟。石垣上題為處士故里。後廟徙。名亦失去。余更為刻石其地。而書本傳於碑陰。碑既立。又可數百年。人生不過百年。而獨汲汲為古人身後名者何也。是為記。

四川提督威信公岳公傳

國朝文匯

卷三十二

國學扶輪社印

乾隆己巳春四川提督岳鍾琪以平金川功 陞見

皇帝賜爵威信公太子少保許乘馬禁城復 命西洋良工寫公像先是

世宗憲皇帝嘗使莽古利為公寫像二一存內府一賜公至是凡再寫矣公歷事

三朝威望著海內窮巷遠谷之民敗豎婦人孺子之微無不知有岳將軍蓋以身為

社稷重者四十餘年公為宋忠武王後裔居蘭州徙西河祖父世為名將父諱昇龍

提督四川因家焉公於經史騷賦天文地理風角之書無不究尤好孫吳兵法由捐

職同知改松潘遊擊進永甯副將定藏擢四川提督平青海封三等公移提甘肅署

甘撫晉川陝總督征準噶爾罷居家金川再起終提督任當公之家居也群蠻傳公

已老死而金川土司沙羅奔跳梁用兵者一載無功及公起募噶魯為新兵噶魯者

游手無賴者也德銳甚運破其跟雜碉樓及葛布基石卡賊死拒於康八達之大碉

公以糧運誘之出火攻殲之金川倚勤歪為門戶而康八達尤勤歪之隘既破賊氣

奪偵知督師者為經畧傅公及公則大驚乞降公單騎入賊營索名飲盡器再索懾

慨諭以禍福金酋涕泣受命送公由皮船歸一番卒樺之群賊夾道奉香跪戰慄猶

觀天神而大學士傅公復戮其奸謀王秋良兒吉及土婦阿扣乃匍匐臺下乞免死

誓不復反金川平蜀之靈部金川為險其外則烏思藏地最大藏北通準噶爾以及

青海石堡城抵西甯邊外諸夷錯處叛服不常公家邊夷悉夷情故所向有功而青海之戰尤聲震天下雍正癸卯青海羅卜藏丹津恃諸番以為之援不順命石堡賊復劫我行旅大將軍年羹堯以屬公佯置石堡不問而先乘雪夜襲斬鎖葫蘆溝揭上寺東轍下寺降果密番據大石揮兵直上堵其山燭喇嘛格弄寺青海道除大將軍使公於四月率兵萬七千進公曰非策也當攻其不備選鋒五千馬倍之遂以二月疾馳進絕水襍而出泉途遇小部落游牧且勸且撫諜知羅卜藏丹津同六台吉眾數萬牧於烏蘭木呼兒公駐師亭士秣馬夜馳百六十里平明至其地四面斫營賊半自夢中起索兵鬪者鼠者號泣者大擾我師奮勇斬殺呼聲動天地人持刃雪一以當百賊潰崩填滿壑谷生擒丹津之母妹並六台吉丹津乘走賊眾準噶爾是役也降王三擒王十五斬首八萬俘獲無算乃息兵破卓子山山絕險唐人所謂不取西番石堡城者也公以精兵躡城背自上下擊大破之寫爾素六族餘老弱千人安插為平番縣當是時公威聲塞外西北屹然長城而羅卜藏丹津數批準噶爾伺邊隙

世宗憲皇帝以公為甯遠大將軍討準夷公入都奏機宜邊將違公部署賊遂入掠公得罪削爵繫刑部令

上御極之次年。放歸田。公長子江西巡撫潘迎公南下。所歷關隘之雄。江流之洶湧。昔人南北戰守之憂。慨然弔古。一發之於詩。歸營安素園。成都郭外。娛老焉。年六十。三乃再起。初準噶爾數窺哈密地。又欲並西藏。策妄阿喇布坦。謬與藏汗拉藏約婚。成以喇嘛五百。而遣其甥車零敦多布襲藏內。應起殺拉藏。據地。時康熙己亥事也。撫遠大將軍統諸路兵討之。公先奉命安撫巴塘。乍了落隆宗各蠻。而誅監占巴墨喇嘛之助逆者。將深入。定西將軍噶爾弼曰。大將軍令軍集。乃發。公笑曰。今軍糧支半月。大將軍在昔爾何可待。遲則賊備堅矣。單旅竟進。十日抵藏。擒偽藏王達格咱。殺諸喇嘛。敦多布僅以身免。諸道兵罷不用。乾隆十五年。駐藏大臣傅青拉布敦誅逆藏汗諸爾墨特。藏亂。兩臣死殉。藏小公班第達方以其兵定難。時公以提督進兵。打箭鑕藏人聞公至。遂不敢動。亂復定。藏在唐為吐蕃強甚。今懷威德如郡縣矣。公字東美。號容齋。長身頰面。隆準而駢脇。所用二銅鉞。重百餘觔。沈毅多智。發若雷霆。之疾。御卒嚴而同甘苦。能知人。治大雄高雄。皆自麾下至節鎮。敦多布據藏遣人調落隆宗守隘。公使治高兩卒偵之。兩人善夷語。為番丐者。見落隆宗酋。為畫計進蠻婦。醉其使。託託哩等盡擒之。故入藏無所阻。得以速成功。公之平雜谷關也。知蒼旺有異志。突逼其巢。縛之出。亦以猝故。賊不及謀。公承

世宗憲皇帝賜御製詩三章及衣物金綺弓馬之屬。

皇上尤眷顧老臣。御書扁額製詩以寵之。免應追銀七十萬兩。官其子泗浚。皆侍衛。淳主事。嗟乎。公固奇才。而遇亦隆矣哉。甲戌以捕忠州逆黨道卒。年六十九。上深為悼惜。賜祭葬。諡曰襄勤。而移其弟廣西提督鍾漢為四川提督。

論曰。余讀公蛩吟藁園諸集。一飯不忘君國。惓惓乎其言之。又聞公左股有癰痕。所割以愈。苗太夫人疾者也。忠孝而文。庶幾乎鄂王矣。公歿二年。準鳴爾手。俘羅卜臧丹津於京師。是臣志也。余入蜀未及謁公。公遽卒。惜夫。得拜公像者亦可矣。

養生論

翁方綱

養生之道。勢逆而理順。知順而不知逆。則失其養。知逆而不知順。則失其養。夫山栖
草茹之輩。吸朝暾而飲夜瀝。自以為得生理矣。至於平淡沖虛。寂處一室。而富厚尊
利。不以櫻其心者。雖不言服食。豈必遜之。然必矜言世味之盡足傷生。而名位事物
舉觸所忌。是談養生者。必屏絕人事。而後能之。則又不然。夫流泉不凍。戶樞不腐。充
其大者。至於日月星辰之躔度。百昌動植之蕃滋。無不新故相推。轉旋為用。焉有枯
槁寂默。以為生理者哉。易曰。君子以嚮晦入宴息。說者但以為休息止息。而莫知其
為滋息也。莊子曰。至人之息以踵。此即貞下起元之義。水歸於尾閭。而發於星宿海。
陽極於碩果。而動於不達復。氣滙於正子午。而驗於平旦。天地之大化。日周行於羣
生羣息之間。而人之血脈應之。故曰。往來不窮。謂之通。利用安身。乃所以善養也。集
義則氣充。無是則餒。操存則物長。舍之則消。世徒知濃味可以悅口。美色可以悅目。
盛音可以悅耳。而不知精理可以悅心也。世又或知無憂患之為養性。無嗜無營之
為養氣。而不知隨事研理。素位居易之所以養安也。君子勞心。小人勞力。明動而晦
休。日邁而月征。不如是。不可以為人。不如是。不足以盡生理。養生之道。如是而已。工
不治器。則穢。農不治穡。則飢。飲連夜以損其神。眠至午以耗其精。而高談清福。以逸

豫為樂。勢分為不足。蓋吾不知其所養也。或曰。以隨事盡理為養生。則感事而動。所傷必多。子應之曰。天下固未有利中無弊者也。善思其弊而豫防之可矣。金石草木之藥。雖有調劑。庸無弊乎。氣也者。吾身自有之物。所以待用也。非所以退處也。用之而稍過焉。則善劑之以補其過焉。胎息訣曰。既思為病。不續為樂。吾常訪羅浮道院。登白鶴峯。至思無邪齋。讀東坡之銘。其詞曰。乃根乃株。乃實乃華。金丹自成。曰思無邪。因反覆於二蘇子相與論養生之旨。驗之木葉。蜀節。收之虎坎龍離。乃恍然曰。事固有順而輔以逆者。是故養生者逆數也。黃陶庵曰。昔賢遇譙集有女樂。未嘗流盼以拇指。搯中指。至明日指痕尚在。險哉人欲乎。然欲不用逆也得乎。若彼繪魚凡之圖。著尊生之箋者。固不必然。斥為非養之正。而樂天放翁之詩。子久啟南徵仲之書。畫皆自適其適。以享大耋。豈必有術也哉。蓋無論學為聖賢。學為一藝。學為長年。皆不越孟子勿忘勿助之二言。而其用之總在乎自然。或勉強而行之。及其成功。則一所謂千塗萬轍。皆可以適國者此也。

擬師說一

柳子厚以馬鄭二子為章句師。而自謂以文翼道。無師之名。而有其師善矣。而洪興祖乃云。學者不歸子厚。故其言如此何也。蓋馬鄭之學。專門執經。篤信而可守者。不

若子厚所謂抑奧揚明疏通廉節之云。自為則精而導人則惑者也是故師者必有
所可守以為質也。書曰。主善為師。論語曰。賢者識其大。不賢者識其小。吾觀漢儒斷
斷持其師說。至數傳而不變者。有所可守故也。後世師道不立者。善無定主。而大小
皆無可識也。故士必先自占一經。而後可以擇師而從之。為人師者亦必先自立一
經。而後不虛所師。至其深造自得之妙。則心之精微。口不能言也。弟子不能必得其
師。師不敢必求諸弟子。道待其人而已。學俟其候而已。若乃高談崇論。以矜所獨得。
倡為人師。與夫游移無據。而不知所師者。厥弊均爾。然今時學者之弊。又皆不在此。
其畏人者。重繩人。其怙己者。重人繩之。每見坐有數人。或曰。某事出某書。某義作某
解。其知之者。必曰。不僅此。又舉他以錯互之。謂吾不甘承其誨也。其不知之者。必曰。
吾亦以為云爾。不甘以為誨已也。長者躬蹈焉。幼者熟習焉。有面折之羞。無謙受之
益。求其篤信師說而守之也。何由哉。王文成嘗戒賓客導子弟以匪僻之事。吾以為
此不待誠者稍惜顏面當不爾矣。惟當祝其勿諛吾子弟。而求其面斥吾過失而已
矣。凡吾之為此說。非以警人。乃以自誠也。吾幼無師而得名早。是以其為說如此。當
世之運於養而優於學者。或不必慮此乎。然吾見朱竹垞以廣譽附於承師。而中夜
悚然汗浹襟也。

擬師說二

天下之學務實而已矣。古今之學通用而已矣。今有煎金者其金最良或次良極而殺之至於最下之金然皆金也。夫且或多其銖兩以準之則下者可以躋於高。次良者可以躋最良矣。有人焉操銅連鉛錫以假為金則有司得窮治之矣。何者物微於實實微於用也。惟師亦然。今將必使天下大而書院小而家塾盡以舉業為俗學。時文為卑近也。凡童子束髮受書則皆以道統之傳期之。無論一時粹無此等人可為之師。即使積世累年通儒輩出亦不得人人抱此願而來受業也。且有重可慮者。今構一詩文尚且積習相輕此不足以害道也。若使一邑之中里塾不下數十天下之大書院義學不下千百此以道鳴彼以學辨。設有好為同異者樹之幟而激其議其害於道特甚而毒於世為不小也。明末幾社復社諸人其始不過分肆五經文而其後遂至水火元黃蔓衍一世君子之為禍反烈於小人不可不防其漸也。然則正學其不可急講歟。曰安得不熟講也就其近而引之也易為力圖其遠而致之也難為功。近者不能假而遠者不能不假也。今如教人為時文則必篤守傳注之人以為之師。精研史漢唐宋諸家義法之人以為之師。則雖一帖括而漸可以得為文之本矣。如教以策論則必考據源委熟諳經濟博通時事者為之師。教以詩賦則必審聲律。

正體裁教以書法。必窮點畫核形聲。豈但已哉。即或小數醫卜之流。亦必導以樸誠。不欺之術。所謂千塗萬轍。皆可適道也。吾嘗見書院為師者。但知看陸平湖講義。而屏除范翔體注。斯已可敬矣。府縣學官。但能不顧贅儀厚薄。而教督月課。亦已稱職矣。訓蒙童者。但能課誦諸經全本。且略識字。則已不素餐矣。若必人人與之反本考原。進而究聖賢之緒業。反恐啟空言之詐。而於實用無補。所謂篤近而舉遠者。此也。抑今日為師者。喫緊之目。蓋有二。曰戒飲酒。曰慎交遊。自書院院長。以及閭巷一經一家之師。日有程。月有課。明動晦休。尚不能給。稍有暇也。則宜與後生小子。研天下事務利弊。究古人言行本末得失之故。而無如為之師者。習與其朋輩酒食徵逐。甚且博塞於燕几之上。甚至招邀聲氣。梯榮弋巧。中於心術。而不可解。他日為人師。又復加甚矣。沿斯弊也。而欲近之於正學之統。是猶達遊者。未知里門。而遽責以堂室也。故因魚門先生之論。而附說之。

陳白沙先生集序

君子所以學者為已而已矣。渾之天地萬物。皆為已也。為已則必無人己間。尚有纖芥累者。有明白沙陳先生之學。則可謂為已而無累者矣。而人猶或謂其西南驛詩。寓意於瓊山者何哉。世傳瓊山之騎三原也。坐吳禎劉文泰輩耳。且說者以瓊山主

會試發策之語度之。試問瓊山發策所指虛慕道學之士。為說異之行以微名干譽者。曾與先生奚涉乎。彼蓋痛斥其時士習之不醇者。俾養學術而正文體也。即與三原尚無與。而況先生乎。三原之去官。在瓊山入閣之後。先生以成化十九年應召在瓊山入閣之前。而瓊山之主會試。在成化十一年乙未。其援此傳會者。不辨而自明矣。先生入京。不謁瓊山。蓋正在以疾辭秩之時。而其祭瓊山文。所云足不至公之門者。又特以自道其積慕未申之隱。而好事者又援斯文與山雨不來之句。並按焉其亦支而弗通矣。粵之先賢如二公者。其學之純實。心之光明磊落。亦可以無他議矣。而世尚有疑而議之者。若此者。甚矣為己之學。眾人不識也。君子之於人也。學問議論。初不必其盡合。然必顯然有所駁正發明。以伸吾見。而期歸於一是。未有口不明言。而故假他端。以寓其憤激者。假若瓊山有所異於先生。則必昌言於先生。而使知之。其未昌言之。則其心無異於先生。必矣。明代士大夫習氣。喜為黨同伐異之論。稍有可假之端。則科道諸曹。譁然交章。辨難迭起。橫議激而門戶立。朋黨眾而權奸熾。自古為學為文之害及世道人心者。莫甚於此。以白沙先生之道。為常伸於天地之間。超然獨立於萬物之表者。而何為亦必援之。使入此而後快哉。予讀先生之集。不足以毫髮闡明先生之所得。顧見序先生文者。斤斤於朱陸異同。江門會稽之辨。予則

何敢焉。因見重刻本尚存黃氏所為應召錄者。而懼覽者之弗究其實。故第就此一條言之。

黃仲則悔存詩鈔序

今年夏聞黃君仲則歿於解州。其冬運使沈公鈔寄其詩來。俾予編次。旣而得洪君穉存所為仲則行狀。稱其詩可傳者凡二千首。今是鈔僅千首。予又刪其半。存五百首而已。又不知尚有可傳之作若干。首落何處也。予旣惜其詩不盡鈔。而於所鈔乃從嚴刪者何哉。予初識仲則於吾里朱竹君學士座上。讀其詩大奇之。自此仲則時以其詩來質。其信予之篤。出於中心之誠。予今日見是鈔。如見仲則。亦相待以不欺而已。予最不服歐陽子窮而益工之語。若杜陵之寫亂離。眉山之託仙佛。其偶然耳。使彼二子者。生於周召之際。有不能為雅頌者哉。世徒見才士多困躓不遇。因益以其詩堅之。而彼才士之自堅也。益甚。於是怨尤之習生。而蕩僻之志作矣。仲則天性高曠。而其讀書心服穿穴古人。一歸於正定不佞。故其為詩。能詣前人所未造之地。凌厲奇矯。不主故常。其有放浪酣嬉。自託於酒筵歌肆者。蓋非其本懷也。仲則為文節後裔。每來吾齋。拜文節像。輒凝目沈思。久之。予亦不著一語。欲與之相觀於深處。而孰知其飢寒驅迫。無尋刻發篋陳書之隙。而其精氣已長往矣。然而其詩尚沈鬱。

清壯鏗鏘出金石。試摘其一二語。可通風雲而泣神鬼。何必讀至五百首哉。所以兢兢致慎。刪之又刪。不敢以酒聖詩狂相位置者。欲使仲則胸中抑塞磊落之真氣。常自軒軒於天地間。江山相對。此人猶生。正不謂以長歌當痛哭也。稱存評其詩出於太白。然此或人多知之者。吾是以不具論。

漱芳西室記

漱芳西室者。翁子筠樓思兄而作也。筠樓之兄雨三。名其室曰漱芳。故茲以西稱。蓋自二陸居參佐廨。遂以東西為兄弟故事。而士衡二十作文賦。已有漱芳六藝之言。夫人生惟詩書文字之味。歷歲彌長。況又以天倫敘樂之思。引而長之。六藝之旨。可勝既乎。雨三為廉吏。有令子。今筠樓又體雨三之志。奉母以教諸子。長松陰於庭。瑞草茁於階。使人孝弟之心。油然而生也。此則芳潤之實理。非所謂摘藻揆華。以為漱藝者也。吾聞之也。萬物發生於東。成實於西。芳之為言。又萬物之精粹者也。其在人則為美質。其在事則為懿矩。其在載籍。則為道德之光。其在家庭。推而至於邦國。則為善氣。仁風之感被。易曰。兌正秋也。萬物之所說也。莊子曰。正得秋而萬寶成。是室也。一名新梧書屋。梧之初引也。得春氣以榮。及其青蒼結實。奉養而茂密。則在乎秋。此亦西之義也。吾家一桂房後。代有聞人。至雨三兄弟同登進士。筠樓又以省試第一。

人起鄉皆近族所罕有。而兩三平生未罄之蘊。奉母教子之休祐。胥於筠樓收其功。而食其報。可謂成實於西矣。往者兩三成進士南歸。予為作漱芳室記。至今十有八年。又為筠樓作西室記。故特發明此義。著之家乘。傳之宗族。並以語蘭色藻等。使知同方共氣之克承有自也。其已見前記者。不復贅云。

洪節母傳

乾隆己亥夏。予得識武進洪君禮吉。發其篋。得所為詩文若干首。皆磊磊志節之言。又刊史傳謬誤若干卷。洪君蓋欲予知其學行所自也。泣而言曰。公可以為某母氏之文矣。君甫壯歲。遊京師。而衣飾樸素無華。曰。吾母教之以安志而平心也。君客於外數年矣。非義之財。視若鴆毒。曰。吾母教之以禮致養也。君所與交。皆文人正士。有延君授讀者。母聞其服官狀。戒毋往。其時相過從者。必審察其學行。曰。擇友最難。當慎於始也。君為學無所不窺。而訓故尤精。蓋母幼肄詩爾。疋漢魏樂府辭。急就章辨。正古今字音義。父嶠峨令。嘗命手書諸經授弟妹。及洪君從母受諸經。難字分日手課之。君猶記讀至禮經夫者。婦之天句。母慟絕良久。呼曰。吾何戴矣。遂廢是句。讀也。君生六歲而孤。母夜績授經。淘麥屑及糠覈以食。而日儲米數合食其子。子不食。泣。母亦泣。洪氏世有隱德。然母居貧。不肯貸於人。曰。惡其近於取償也。每訓子。輒陳說。

先世遺澤。及居官善政。聞於君父。監生君者。為子制衣尺寸。必使如其大父及父時。曰。毋隨俗遷改。又曰。汝父生平砥礪行。吾望汝為完人。非求貴顯也。嘗積紡績。及子授讀所入。舉三世七棺。遇諸如暨。撫諸從子尤厚。姊婦余蚤寡。以次子迪吉後之。通州人盛聰者。其第覆舟於江。君父監生君出之。監生君在齋。比戶失火。聰冒死翼棺而聰貧。一子年幾四十未娶。母鬻錢裝助之。其以內行為教。皆此類。嗚呼。節母之孝慈者。世固有之。至於服飾取子之際。關係人士之品概。世教之廉隅者。求諸壺訓。不其難歟。若夫函雅故。正文字。尤婦人所難。而在母則尤其小者。故洪君以副榜貢生。克有聞於時。蓋不徒以其文矣。監生君諱勉。其卒也。母年三十八。母姓蔣氏。卒年六十三。洪君以母命客處州。聞母病遽歸。已後含斂十八日矣。故其求所以傳母者。哀切尤異於人。嗚呼。吾文何足以傳之。

惺齋王先生墓志銘

先生諱元啟。字米賤。號惺齋。先世自杭遷嘉興。曾祖國泰。祖承榮。父昌業。世有隱德。先生幼即有志聖賢之學。不為時俗文字。舉乾隆甲子浙江鄉試。辛未成進士。署福建將樂縣知縣。三月而罷。然其釐訟獄。禁賭博。設十家牌。平鹽價。立排糶之法。禁質庫重利。濬溝渠。修橋梁。道路諸實政。悉殫心力為之。邑人以為抵他令數十年之功。

既以誣被吏議復至其邑民扶老攜幼饋粥米汲甕及鄰境之民皆歡迎如慈母先生雖於經濟未竟其志而教人之用尤著前後厯主講席於延平道南書院者再又於仙遊之金石邵武之樵川順昌之華陽蓋在福建最久也河南則衛輝之崇本山東則濟南之濰陽蒿庵曹州之重華於其鄉則鎮海之鯢池三十年間十主書院之任所成就之士以學行文藝科目著顯者數千百人先生為學以宋五子為宗說經尤精於易而為文一本韓子撰讀韓記疑十卷周易四書講義史記漢書韓非子孫可之歐曾王文集及錢文子補漢兵志諸書校正評註凡若干卷惺齋論文勾股九章論祇平居士文集奉壽堂家訓若干卷凡嗜學多文之士知考訂者輒多厭薄宋儒以自喜今日學者之通患也先生博極群書勤考證工文詞而篤守程朱之旨終身勿貳誨人勿懈若先生者可謂真儒矣既病革猶補註周易下經及易簣前一日猶命子尚繩改定順宗實錄記疑條中二字蓋其貫天人古今之精力畢世以之先生生於康熙五十三年七月十一日卒於乾隆五十一年七月一日年七十有三娶沈氏例封孺人子男三天石早卒尚珏附監生四庫全書謄錄廣西候補縣丞尚繩增廣生孫男二克任國子生克新孫女一曾孫男一銘曰

孰能博綜漢唐而篤執程朱淵哉若人不見是圖學則伯厚東發教則鹿洞蘇湖益

超出乎籍湜紹述間而獨為韓之徒

戴園程先生墓誌銘

昔方望溪為李剛主志墓於習齋竟繩諸人自別於程朱之非痛切言之廖道園所為慨然於魯國許公以表章程朱為己任也新安程編修戴園少以文名江南乾隆壬午始官京師予與接席賦詩目為淹雅者流耳後十年予自粵東歸始與深交往復劇切者十有二年嘗歎其博綜經史詩文撰述皆所易幾而獨其篤守程朱為後學所宜矜式也君束髮時讀戴山劉念臺人譜見其論守身事親大節輒心慕之故以戴園自號其後綜覈百家出入貫串於漢宋諸儒之說未始不以程朱為職志也著正學論七篇反覆於體用博約之際嘗與友人書謂宋儒講太極河洛牽入麻衣希夷之說又以鄭衛為淫詩其他小誤處間亦有之大者止如是至於天道人紀節心制行務為有用之學百世師之可也古人一飲一食必祭先嗇先農是不忘本吾儕被服儒素亦思其源安在而敢自異乎君治經之功與年俱進著周易知止編三十餘卷尚書今文釋義四十卷尚書古文解略六卷詩毛鄭異同考十卷春秋左傳翼疏三十二卷禮記集釋若干卷諸經會問十二卷群書題跋六卷又所為詩文凡若干卷桂宦書目若干卷桂宦者君讀書室名君家素饒於財自少至壯積書三萬

餘卷中年已後家落而書亦稍散失矣。君先世系出周大司馬伯休父。封於程。以國為氏。西晉末以宦遷新安。君之高祖自歙遷揚。以鹽筴起家。君早失怙恃。中遭逋負。然家固業商。兄弟三人接屋而居。食口百人。延接賓客。譙集無虛日。君好學工詩。及見江淮老宿。一時若無錫顧震滄。華牛江宜興。儲茗坡。松江沈沃田諸君子。咸與上下其緒論。然屢躋於場屋。肄業國學。南遊金陵。愛栖霞牛首之勝。憑眺山川。攷證古今。所至傾其坐人。歲壬辰。應召試第一。授內閣中書。乃悉棄產。償宿逋。攜家北上。辛卯成進士。授吏部主事。癸巳授命與修四庫全書。丁酉授翰林編修。君遇益隆。學益進。家益貧。然其豪氣真摯。發於天性。嗜書籍若飢渴。待朋友如性命。赴人之惠。周人之急。猶不減其家全盛時也。君詩善言情。纏綿往復。於家世盛衰。儕偶聚散。娓娓數百言。然獨拈鬚俯仰今昔。而君亦垂老矣。君苦末疾。然嘗有山水之思。欲遊河洛。關陝。歸老江甯。卜一廛以畢志。癸卯秋請假出都。由中州歷華嶽。抵關中。而疾不起。今中丞畢公為經紀其喪。撫其孤南歸。護安厝於江甯。中丞之篤於友誼。為士林所推。而君之風行信於朋友。即此可知矣。君諱晉芳。初名廷鑣。字魚門。內閣中書協辦侍讀事。充方略館纂修官。吏部驗封司兼吏選司主事。以翰林院編修加四級。誥授奉政大夫。文淵閣校理。充四庫全書纂修官。武英殿分校官。辛丑科會試同考官。

生於康熙某年月日卒於乾隆四十九年某月日。年若干歲。子二。長瀚。次某。銘曰。昔賢所闢。緒在七閩。君籍新安。力學維純。疾彼夸博。而背其真。窮經致用。修辭輔仁。有粹其實。有斐其文。博極萬卷。不忘本根。江水滔滔。鍾山嶙峋。石室雲封。詞林學人。

翟晴江先生傳

梁同書

晴江翟先生名顯字大川。後改字晴江。翟氏世居汴。明處士應隆始遷仁和之臨江鄉。三傳至漚舍封公。先生其仲子也。性簡訥。好讀書。家素饒裕。有賈業于京師。封公使先生北去督之。因得友當世魁儒傑士。以益砥于學。先生畫則與賈人子伍。操奇贏握籌算。凡尺度淳制質劑之屬。悉經理焉。入夜閉一室。一燈熒然。讀書不輟。漏四下始寢。或竟夜不寢。已。腹客至。不得通戶。懸小鉦。若鈴索然。客或黝之于戶外。頻擊鉦弗應。日禺中。起。復治賈人事。率以為常。作為詩文。閱中肆外京師諸先達。漸有知先生者。吾杭鄭筠谷金江聲杭董浦諸先生咸與定交。以國學生屢試京兆不利。乾隆癸酉。舉本省鄉試第六人。明年成進士。名日益起。諸先達爭欲羅致出門下。而先生性朴直。恥以呈身博高第。謝不往。名列三甲中。例選知縣。先生曰。非吾所能勝也。吾木強不能取悅上官。即不以墨敗終。當以不稱職罷矣。投牒銓部。改就教職。丙子教授衢州。越六年。丁封公憂。以歸。繼丁母太孺人憂。服闋。需次十年。補金華教授。又六年。以年至乞休。又三年。歲在戊申。而先生歿。生平無他嗜好。壹意于書。自經史外。苟可資多識者。靡不覽。諸子之瓊論。百家之瑣語。山經地志之異聞。荒寂破壁之奇字。包孕而貫串之。下至街談巷說。亦必考所由來。有所得。輒劄記之。意或齟齬。則旁

參互訂。穿穴以求其合。自壯至老。手弱翰一管。撰述無倦。目短視。離牘纔寸。客至前。不知也。教人必以誠。有以古書義質者。如縑繭絲。如決奔泉。反覆數千言不竭。所著四書考異。爾雅補郭。湖山便覽。草塘辨利。院志通俗編。無不宜齋詩彙。已版行于世。未刻者。家語發覆。周書考證。山海經道常。說文脩經證。漢書藝文補志。太學石鼓補考。艮山雜志。龍井記略。南澗理安寺志。潛福院志。二衢可談錄。玉屑篋。涉獵隨筆。平泉小隱詩話。桂隱百課箋。歷朝著題律。邊無不宜齋詩文全彙。藏于家。先生雖官止學博。不顯于時。家日落。不得比中人產。然著書等身。歿而不朽。亦可以無憾矣夫。論曰。吾郡城東北門曰艮山。居艮山門之外。同時以博通稱者為兩人。馬一為先生。其一則西林吳先生。吳先生不應舉子業。惟古是耽。所著歛幽錄。說文理董。讀古之士知好之。特不若先生撰述之勤且富耳。吳先生奉釋氏教。于內典尤精。而先生則不信西方聖人之說。嘗自言童子時。讀書塾中。有僧過其門。適塾師外出。率眾童子持梃往擊僧。僧踉蹌走避。封公見而撻之。先生曰。吾惡其禿也。故雖甚好書。卒不喜瞿曇氏之書。其不同如此。嗚呼。此可以觀先生矣。

吳一峯小傳

余表弟張仲雅工詩。能取友于梁溪。得詩友曰吳一峯。短視善嘯。性孤立寡交遊。簡

濶不稱人意。弱冠工算術。一試算學生。再補博士弟子。年二十五。中丁卯順天副榜。皆非其志也。時汪文端公賞識之。留止邸第。文端故多藏書。一峯得徧讀之。胸中于是益博。生平作詩著書外。無它嗜好。家故亦貧。不能閉門隱。輒挾破硯走東西南北。傭筆為食。四方賢士大夫耳其名。爭延致之。然落落不苟合。少不當意。即拂衣去。游迹幾徧天下。所得詩亦不下數萬首。既自削去大半。鈔存一十六卷。大致生峭清麗。不肯作寒餓語。嘗自期以無俗韻。無懦響。無杜撰字。則所詣可知矣。著書凡二十八種。說經居多。子易詩撰述尤富。夫以君淵雅之才。俊逸之筆。倘得所遇。足以較轢一世。而乃鬱鬱牖下。死年止五十有六。命矣夫。余與君有同年之雅。江浙相去四五百里。聞聲相思。未一識面。所知皆仲雅道之。嘗告余君小年事。有父友枉車騎過之。欲呼與語。不應。至再。竟僵卧不肯出。蓋自童子時。其性僻已如此。仲雅不為誕辭。不為溢美者。故可信也。君姓吳氏。名峻。一峯其字。又號黼仙。父鼎。以進士官工部主事。曾祖祖並以君從父鼎貴。贈翰林學士。君以名家子。克自樹立。成一家言。亦其淵源有自也。

論曰。昔謝臨川稱劉公幹。卓犖偏人。而其文有氣。所得皆經奇。一峯似之矣。偏非文人。美目。然其所以卓犖者。固在是。不則為鄉愿。為胡廣中庸。又孰薰而孰猶耶。余既

傳君因思天下之大耳目之所不及如一峯者或亦有人而余恨不能一一傳之雖然一峯有知其果以余之傳為重輕乎哉

大同府知府雪廬袁君墓誌銘

山西大同府知府袁君先文莊公乾隆壬午主順天鄉試所取士也君始以諸生食廩餼循例肄業太學以訓導待選既捷賢書于丙戌會試榜後取國子監學正己丑榜後復取中書未補用以考取咸安宮教習期滿以知縣揀發江蘇歷署睢甯南匯旋補宜興調武進又調銅山晉江甯船政同知又以保舉送部引見特授山西大同府知府兩署雁平兵備道事年七十有三卒于官君以文學起家為政慕古循吏而治獄尤詳慎其官宜興也縣有積獄千餘自君蒞任坐堂皇聽決至漏四下不倦卒以次胥斷先是有丐徒聚匪劫掠戕人命再矣而未得主名君一日過廢刹見其旁有人瑟縮然疑之執訊之得其先時殺人狀發其藏有血衣存卒逮捕其黨真獄以上分首從伏誅靖江獲盜七人已擬辟矣大吏檄君復勘君察其非盜也斫鞠之得其為盜所脅情甚確卒白于上脫之君以能治獄名故大吏亦屢檄君會勘他邑獄其所平反甚夥其遇事精察尤能慮度終始宜興縣旁東西兩汊路通洞庭易為漁戶藏奸君為編排網舟字號宵小無以匿宜興產木甲他邑歲納糧時糧戶競進

君慮其狼戾。為按日分區。納者無後時。亦無敢爭先者。君既去。宜興後奉以為法。其官銅山也。值淮徐二府歲大歉。君下車。按城鄉遠近。分設粥廠。日詣親驗。胥吏無敢為姦。時有以大戶囤積告者。君徐諭之曰。安富戶。即以育貧民。何賒擾為。既大戶亦感君意。爭輸粟數百石。數十石不等。賑賴以繼。銅山舊例。辦稻料備河隄工。恒苦不給。君為分歲料以儲常需。撥飛料以濟急用。用以無關其任大同也。所轄七縣一州一廳。事無鉅細。咸親理之。無留牘。大同舊隸邊外。紅旗牧地。凡市易投稅。周巖嶺三百六十餘里。君心惻其遠。牒請于得勝堡設關代徵。計程近二十里。商民稱便。郡治興雲橋。為元泰定中建。縣亘數里。歲久圯。行旅病涉。君捐廉俸。創始鳩工。期而工竣。蓋君之為民計。非止一時一事。惜夫君之不得永其澤而遽沒也。君少以懋學能文。有聲蔓序。及登仕籍。屢任劇邑。一為大府。其所設施卓犖如是。賢者固不可測。而或謂政事與文學不能合一。豈其然乎。惟先公始以文學知君。不得見君之政事。余獲附通家之誼。又悵君久宦于外。不得及君之生時。數接其言論也。然自君沒而游先公之門者存亦鮮矣。悲夫。君卒于嘉慶五年八月十九日。諱知。字紆亭。雪廬君號也。籍杭之新城。徙居錢唐。則自君祖始。君祖諱岑。考諱可達。並贈如君官。祖妣朱氏。繼祖妣周氏。妣周氏。皆贈恭人。其封恭人者。姓朱氏。為君之配。長子涇。江蘇淮安府山

盱通判次子濠。候選府同知。先君卒。濠則君之第三子也。女適同里歲貢生候選訓導祝鼎孫二人。桐槐孫女七人。君卒後十年。庚午八月初十日。涇等卜葬君于西溪小馬山之陽。以朱恭人祔。先期來請銘。銘曰。

處純儒。出循吏。維民賴良有司。君起而尚吏治。江之左。民曰微君。我民誰倚。山之右。民曰君逝。君惠在口。生有祠。去有碑。繫良二千石。姓名昭垂。而欲不沒于千秋。視此銘辭。

王陵論

黃達

王陵非漢純臣也。史稱王陵有母。自殺以安子之心。俾得佐高祖。定天下。成漢家勲。吾則謂王陵可以不事漢。而其母亦不必自殺其身。適貽子以不孝名也。何者。陵始為縣豪。起豐沛之間。高祖嘗兄事之。後乃以兵屬漢。初未嘗委贄為臣耳。當項羽得陵母置軍中。陵使至。則東嚮坐。陵母欲以招陵。陵此時惟有痛哭流涕。以感動項羽。或者項羽憐而赦之。未可知。不然。歸楚以全母可也。否則隱處南陽。躬耕以老。項羽雖殘暴。亦何至遽加鼎鑊之慘。彼見高祖雄才大略。非啗啞咤叱者所可比倫。因決意歸漢。并率其黨數千人。皆臣附焉。則其母之伏劍。與項羽怒而烹之。固早在陵意料中。天下有忍于殘害其母之人。而佐命立功。遂可告無罪于天下後世哉。雖位至丞相。封侯傳爵五世。殺其母以成己之富貴。君子所勿取矣。昔徐庶薦孔明于先主。及曹操獲其母。庶謂先主曰。本欲與將軍圖事。今失老母。方寸亂矣。請從此辭。遂歸操。庶自薦賢外。無赫赫功。而審擇于根本節目之大。以此較彼。賢不肖相去何如也。後太后欲王諸呂。面折廷諍。杜門自絕。論者謂陵雖少。頗許安劉氏功。不在平勃下。夫人苟孝行有虧。則其他皆無足數。王陵安得為漢純臣也哉。

韓侯祠記

余自壬午夏來與淮學韓侯之故里也。始入境即過所為淮陰市橋者。廟貌頽圯。祀事不修。未嘗不歎侯之英爽赫奕。宜食報于其鄉。而世遠典湮。斯亦官于是土之責也。未幾。漕帥楊公檄山陽令。徙建縣治之左。飭材鳩工。閱數月告成。而韓侯祠煥然復新焉。嗟乎。侯負個萬奇傑之才。落魄窮愁。漂母憐而飯之。後登壇為大將。佐漢高取天下。雖終以讒被法。其精氣之所聚。當必能顯威神以福其土。世祀勿絕矣。祭法以勞定國則祀之。夫懿好之在人心。苟有功德可紀。不必于其生長釣遊之地。凡仕宦之所經流寓之所託。皆將建立祠宇。春秋報饗。況侯實鍾淮之靈秀哉。淮之運河隄畔。故有漂母祠。侯之釣臺在焉。而祠廢勿葺。非所以肅明裡之典。垂示無窮。則洵矣。楊公是舉之與祭法有合也。因作迎神送神之曲。其辭曰。

淮之水悠悠。湖之雲油油。宮殿式煥兮。安我韓侯。功成百戰兮。蹶項興劉。宜廟食以崇報兮。考鐘鼓而清謳。神靈返兮。香綰縕雲。車風馬兮。自天門。嗟禍起鍾室兮。莫知其冤。灑英雄之血淚兮。何處招魂。願侯降福于茲土兮。永祀勿譏。

遊晚甘園記

余客淮陰久。荻莊柳衣。歲或一至。至晚甘與之鼎足而立。遊屐未到。蓋土人所稱南園者也。四面環水。菰蘆叢雜。不尋其徑。雖近在咫尺。如蓬萊仙島。可望而不可即。

故園特幽異而深秀。庚寅秋。將君丹山。邀余遊。輕舟如葉。可容兩三人。水清見底。萍隨風蕩漾。過一小橋。持篙者偃僕。然後能入。再進。則所謂南園者在焉。醉霜紅。鶯參差掩映。夕陽欲下。宛如一幅畫圖。又有殘花滿庭。蕭疏可愛。孤鶴一聲。戛然如在空際。因各據石坐。少憩。馬已而登樓。向所一再至之荻莊柳衣。歷歷在目。將無置身高處。境界又有不同者耶。園為晚甘主人別業。曾偕其叔父爽林水南兩先生。提唱風雅。延致海內知名之士。文酒譚會。一時稱盛。至於今風流雲散矣。余始至。主人尚未宿草。疇昔觴咏之地。每思攜短筇。縱覽其勝。乃遲至數年後。始得問津焉。徘徊憑弔。恍如晚甘主人。晤語于珠湖淥水間也。返而登舟。將君曰。願有記。于是乎書。

姜孝子傳

姜孝子。名元凱。華亭人也。曾祖雲龍。明內閣制敕房撰文。中書舍人。厯太僕寺少卿。祖爾銑。父鏡如。並候選州同知。母茅氏。孝子賦性惇篤。五六歲往來親黨間。與之棗栗。輒勿食。問其故。曰。我以奉父母也。宗族嗜嗜。稱姜氏有子焉。久之。父游京師。奉母家居。晨入學。必執書囊依膝下。既問安。然後去。暮歸。牽衣侍側。或誘以戲。嬉不一動。比歲祔。繼疫。孝子默禱於神。方夜讀書。聞空中語曰。里中有孝子。勿可犯。時道路死者相枕。與孝子為鄰者。皆得以無恙云。一日隨父渡江。中流暴風。舟幾覆。孝子哀慟。

顓天。忽若有挾之以登岸者。人咸以為至行所感焉。

聖祖南巡。內大臣馬公扈蹕至松館。孝子家欲挈之往京。孝子以親老辭。未幾其父經營窳劣。適足荒山中。觸冒寒暑。積勞失明。孝子迎醫療之。百無一效。竟嘔血數升。以死。時年四十八。生二子。長早殤。次子尚幼。將易簀。語其妻以仰事俯育曰。爾能是我死無恨矣。故其妻亦克以孝稱。其臨終詩曰。但願曾西養。曾哲誰知顏。路泣顏回聞者莫不悲之。

黃子曰。余讀後漢書。姜伯淮以孝聞。被徵不至。後士游事母尤謹。有甘泉躍鯉之祥。元凱本其苗裔。而至性過人。嗚呼。何姜氏之多孝子與。

川沙同知鮑公墓誌銘

乾隆二十五年秋。董漕同知鮑公。延余課其子。越明年。移駐川沙。余隨至行署。又明年。赴淮安教授任。與公別。未幾。公以訃聞。卜葬有日矣。為誌其墓而銘之。公諱成龍。字夷門。鳳陽人。以選貢授成都令。陞打箭爐同知。金川蠢動。守將其潛逃。賊出不意。夜將半。擁眾至。公率家丁依山列陳。多張旗幟以惑之。賊疑有伏。竟引去。大以佔畢書生膺民社之寄。一旦變起倉卒。奮不顧身。親冒矢石。保障封疆。視彼武臣健將。望風退避者。相去何如也。川督某與撫軍某相齟齬。囑公索其瘕不得。用是銜公。假鍊

寘之法。惟時家財蕩沒。眷屬數口。寄食省門旅店。孤露流離。睽隔數百里外。傳聞者或言公已死。老妻弱子。哭聲徹晝夜。感動行路。而公身履艱危。恬然不以介意。非中有所得而能若是耶。後川督賈忠勇傳公為經略。事乃白。補官松江董漕同知。甫蒞任。缺已裁。改川沙海防同知。川沙係海濱荒僻。檄委修築塘工。風餐露宿。身先畚鍤。不閱月而告成。繼攝上海邑篆。百務蠅集。據案立剖。並無留牘。邑有申江書院。公嚴立課程。每捐清俸以示獎勵。會當科試。矢公甄拔。夜漏將盡。一燈熒然。猶手自披閱。榜發大慙眾望。其培育人才又如此。桂林陳相國巡撫江蘇。器重公。特保薦知府。而公旋以病自劾。免官矣。公居閒散之秩。矯矯自守。裝橐蕭然。一切苞苴請託之事。不得行。同寅某招公飲。衣質典庫。託故辭之。其清廉略可見矣。所著有蜀中草若干卷。余為之序。公生康熙某年某月某日。卒乾隆二十八年某月某日。娶某氏。封恭人。子二。長某。侯選州同知。次泐。郡廩生。從余遊。嗜學能文。以某年某月某日歸葬公于某鄉某原。銘曰。

葉忠節公墓表

氣之壯。貫星斗。品之純。比瓊玖。蹶而起。官不久。嗇其身。宜有後。自古英偉奇傑之才。所以扶植名教。垂表人倫者。原自有豐功駿烈。展布于時。而非

國朝文匯

卷二十三

二十三

乙
國學扶輪社印

徒遇事窮勢迫借一死以塞其責也。然或處遭逢不幸人皆泯忍求活獨曉然于大義之所在而殺身成仁。于以流芳史冊。照耀來茲。如葉忠節公者。洵矣其不可及。公諱映榴。字丙霞。上海新場鎮人。後析縣始隸南匯。考諱有聲。明副都御史。以直節顯。公夙承庭訓。少時即自奮勵。中順治辛丑進士。選翰林院庶吉士。改編修。歷官湖北。糧道。康熙二十七年。撫軍某酷御其下。武昌兵謀為逆。有眾數千人。突至轅門。露刃呼譟。撫軍某倉皇失措。竟潛逸。公聞變。馳往諭以朝廷威德。爾等無作亂。眾不應。且脅之從。公嗔目叱之。奪刀欲自裁。賊曰。殺好官不祥。羣蜂擁入署。環以兵。公見事不可為。繕遺疏望闕再拜。升公座。刎死。賊大驚。歎息而去。事聞。贈工部右侍郎。陰一子。御書忠節二字諡之。夫當禍災猝乘之會。身為雄藩重寄。失定亂之才。略望風退避。公冒險直前。曉譬賊以大義。雖勢敵方張。力未能撲滅。然彼洵海者。猶知好官不可殺。使爾時竟顧惜性命。接踵逃。則平日藉高官厚祿以養養其妻子。一遇患難。視若秦越之不相聞。國家亦安賴此臣子為耶。蓋惟公有所得於中。故能臨事不惑。從容就義若此也。我郡丁明之季。陳黃門夏考功諸人。類皆致命遂志。卓然為邑乘先。以公之貞操亮節。後先輝映。斯亦足以風厲末俗。愧為臣而不忠于所事者矣。余與公之孫約岑交。以表墓之石。請公居官政績。與夫生死年月。及世系子姓。自有傳不

具書特綜其死難本末揭之于陴俾後之覽者興起焉

國朝文匯乙集目錄

卷二十三

蔣

衡

字湘帆江蘇金壇人
賜國子監學正銜後太學訓石理即用其本有拙存堂集

恩貢生乾隆初以手書十三經進呈

贈山陰姜藻亭序

曲阜西柳莊蕪園記

天都程含光鞭虎救弟記

李孺人傳

管社山人紫洲楊君墓誌銘

河南夏邑縣彭君蔚村行狀

顧詒祿

字受百江蘇長洲
人有吹簫園集

韓信論

明少司寇王公傳

周隱君傳

迂村子傳

蔣

衡

字丕昭號芝岡江蘇長洲
人州貢生官江西按察使

重建西洋江樂安橋碑記

十

周天度

字心羅號西隱浙江錢塘人乾隆壬申進士官河南許州知州有十編齋文集

馬市圖序

十一

申泉銘

十一

楊國聲傳

十二

顧光旭

字晴沙江蘇金匱人乾隆壬申進士

十四

重葺邵文莊公祠堂記

謝

壻字金國號寬城浙江嘉善人乾隆壬申進士官至吏部侍郎有文集未見

十五

校刻逸周書序

十五

重刊荀子序

吉夢熊

字渭崖江蘇丹陽人乾隆壬申進士由翰林官至通政使

十七

姜上均徵君鄉賢錄序

送畢秋帆庶子任鞏階秦道序

十八

錢

戴字坤一號蕙石浙江秀水人乾隆丙辰薦舉博學鴻詞壬申進士官至禮部左侍郎著有蕙石齋文集

二十

陶氏洛山墓田記

戚遠江家傳

二十

吏部文選司主事康古汪君墓誌銘

二十一

處士張篤菴墓表

二十三

國朝文匯乙集卷二十三

贈山陰姜藻亭序

蔣衡

人生意氣之合出于性哉情先之矣千里百里未嘗一通姓字而臭味之投時無論久暫事無問大小數語所感相視而笑遂莫逆于心嗟乎友朋道盡夫天指曰臨小利害反擠下石者皆是懸羹而吹齏夫豈不夙夜寒心然而倏有所合情動于中復至於不可解如此而必欲違已拂性使人道終絕于天下則又何忍爲余與山陰姜子藻亭交不知其何以遂至于斯也庚戌夏余至曲阜寓孔大令樓齋署時修

孔子廟四方士雲集往來者日多而藻亭契我尤甚既同處一齋語默食飮呼吸相關藻亭身長而瘦挺才高機敏性躁急爽朗不能容物慷慨負意氣父汝刻公教子最嚴毫髮不假借藻亭讀書能文章未嘗少有所觸忤幼隨其父出入蜀川下沅湘洞庭漢江彭蠡而豫而燕趙齊閩粵東西無不到也兄臨臯有奇氣好夸大不事家人產卒于都下時藻亭客中州聞之奔赴已厝于京師西便門外地有四棺問使者妄指以對藻亭乃題詩刻石誌其處復出都謀返葬資未一年朝廷新例家無停柩荒塚盈野藻亭竭力蓄資詣舊時所誌塚哭拜啟棺非其兄也大驚搶地呼天曰嗟乎姜枝死矣數千里外匍匐而來將求兄旅櫬乃誤開他人棺冒不赦之罪罪雖死

不忍吾兄死骨之終于莫見也。復連啟兩棺。又誤于是昏迷氣絕尸家訟之于官。拘係藻亭。藻亭流涕陳情。獲免。藻亭曰。吾幸而復生。兄骨其猶有望乎。乃輟轉呼號。獨宿于百千荒塚間。狐狸鼠雀出沒之所。冀鬼神或有靈。得以夢告而申旦。寂然悲憤益切。因以重利屬其土人。遍尋始得真塚。啟視則頭顱鬚髮宛然。附身衣衾皆與家人所言合。于是易棺重殮。扶至山陰。泣拜告于其嫂而安葬焉。藻亭至今尚未有子。身客幕中。以俸金寄其弟羽豐。理家事。誓曰。吾弟兄苟有二心不同居者。身首異處。弟亦奉兄命。惟謹。藻亭于兄弟之倫。死生盡義如此。此余聞其言。為之俯首下心。敬愛之深入于肺腑。欲大聲疾呼。使凡有性情者。共則倣之。庶於天理人心。猶不至一朝盡泯也。夫藻亭與余亦不過萍水交。若非其至性過人。使余傾倒。雖馬遷楊雄。再世老人。未輕心折也。況區區富貴乎哉。藻亭先贈我以詩。而尤喜吾文。余不能詩。故為道兩人所以相得之故。俾吾黨之士。咸知立心行己。自培養天倫始。則其于友朋當不求而自合矣。藻亭其許我否。

曲阜西柳莊蕪園記

沂水發源于尼山。迤邐過阜城。至金口壩。合泗壩之上流。五里為西柳莊。有蕪園。敕褒孝子魏防西。與其弟文西居焉。余三十年前。至曲阜。識防西。庚戌夏。重來。小春之

月邀至其家園皆茅屋翠柏參天至則坐樹下石案可環五六人山肴野蔌俱極精潔飲必暢起步林外平曠數畝藝雜花四時不絕適當霜寒楷葉赤木瓜嫩黃香橙橘柚累累掛樹頭天清地闊意曠如也乃入窄徑古藤交橫路口俯首穿桃鉤衣摘憎夾岸密葉蔽天日忽撥茸上登豁然臨沂水銀沙萬頃遠見漁舟樵侶別開一境就地據小石復飲醉而別辛亥暮春再集同人歡飲顏子清谷濯足水濱清淺可愛衆從之文西發舊醕溯流乘激湍放杯余畫沙題句諸君皆和廣文先生孔魯庭醉倒中流主人樂甚陳筆墨屬紀勝事余信手疾書數百言卷幾盈丈昌平山人補圖請重書之余觀今之園林壘石鑿池亭臺魚鳥爭奇鬪勝數年而頽垣蔓草凋落殆盡始未嘗不極一時耳目之盛及其敗遂不可收拾無他人巧竭而天真滅真者不朽而不真者易壞理也推之人世富貴貧賤君子小人榮枯消長當亦復然魏氏園五世子茲矣其先曾祖參議公以拒逆璫聯譜之請罷歸置斯園祖文簡公令陝西金縣父孝恭先生兩任廣文歷年既永宜其心思物力不足侈營邱壑歟乃純任天真命名曰蕪迄今子孫世守弗替孔子曰其知道矣乎人之巧固不能勝天之拙也孝恭殁防西廬墓哀號鄉人敬之為請思養故又謂之魏孝子家園蓋孝尤天真之至云

天都程含光鞭虎救弟記

至行多奇。奇必發于天性。此非人力之所能為也。愬而行之。鮮克有濟。余所聞天都程含光少時鞭虎救弟事。可謂奇矣。康熙乙卯秋。含光偕仲弟某自六安歸。過蕩嶺。嶺峻且險。會日暮。四顧絕人煙。沈陰黯慘。二人各策蹇行。俄而腥風驟起。飛砂疾捲。木葉撲面如雨下。猛虎攫其弟去。含光大驚墜地。持短鞭力追。左手據虎頸。右以鞭亂捶虎頭。呼號聲震山谷。虎怒力不得肆。舍其弟據嶠而咤。將以搏含光。含光負弟疾奔下嶺。投旅店。既息肩。其弟尚一息未殊。以湯灌之。徐甦。含光喘亦略定。起視仲肩背前後十餘孔。血淋漓滿地。復大慟。有道士謂之曰。虎牙有毒。深入。惡血不盡。出不可救。含光竭力以口遍吮之。去血數升。醫數十日漸平。乃偕歸。當是時。含光仲弟甫十有五歲。今年已近八旬。其傷痕累累。可數。俱寸許闊。每解衣示人。則淚涔涔。念乃兄不置也。含光大程郡望族。幼具至性。偕諸弟讀書。因家道中落。謀所以養親。遂以治生為急。奔走大江南北。家少康。遠近親朋重其才。有重務。悉資之。未嘗以勞瘁辭。故不克永世。又聞含光能盡孝。養歸囊所有。必陳于父母前。不少私其妻子。與人交。重然諾。濟困解紛。人咸賴之。而竟以中年隕命。嗚呼。含光至此死。死亦可以無憾。向使虎攫仲弟時。氣綏戰慄。伏地不能起。即起欲圖所以救。區區一竹鞭。何足撓虎。

威唯有坐視其弟靡虎口或捐軀與之同盡耳而含光當其時奮身一往目中不知有虎并不知其為竹鞭且不知有己唯痛弟之危難而奔赴之其死其生不暇計余故曰此非人力之所能為也誠也至于今八十老翁一鞭撫摩時時以血淚拂拭光瑩滑澤如鑑珍藏以為世守真千古奇行足以垂教友愛云後乙卯金壇拙存老人蔣衡客廣陵蕃釐道院友人屬為記且銘其鞭銘曰

李孺人傳

乙酉流賊陷揚州。處士羅經甫妻李氏率其家婦女十三人。闔樓自焚死。其孫憐遇余于秦郵。泣涕請為之傳。曰。憐聞祖母李孺人之死。非但忍辱身。因曾祖母春秋高。吾父纔六歲。欲吾祖盡力全老母。以及藐孤羅氏。至今一綫不絕。實賴有此。按孺人為浙江龍游李崑吾女。幼習女訓。通詩書。處士之繼室也。元配有女官姁子。都撫之如乙出。當城未陷時。孺人從容謂處士曰。城旦夕且破。妾請以死報君矣。乃給姑匿別所。與其姁劉氏。妾梅氏。李氏。升樓積薪。都甫六歲。牽裾呼號。孺人仰天大哭曰。嗟乎。吾所以不忍者。惟太夫人與此穉子耳。然事急矣。命家人攜之下樓。即舉火。是時

孺人懷妊已八月矣。聞賊淫掠肆毒。或截人手。割人乳。煮食之。甚至裸孕婦。競決其腹中男女。剖而驗之。以為戲。因諗於衆曰。是尚可生乎。狗彘不若矣。劉氏輩乃相持哭誓不苟活。宦姑年十二。亦抱母哀號。請從死。及城西北隅垣崩。賊兵登垣。市人驚呼曰。城破矣。命婢菊。花倉皇舉火。火舉。菊奮臂一呼。躍入身。繞半仆。遺一足未火。皺愈白骨枕藉。糾結不可解。家人斂之。并菊花一足合葬于州城西華門外。孺人之歸處士也。年未久。善事舅姑。相處士成家業。和于娣姒。御下有恩。倉卒中能命人保護。子都去而所生女三齡。則同死火中。甲申京師陷。先外舅王汲公大興人。繼母魏恭人也。匿外舅于他所。抱己女及長姪女。媵婢十七人。投井死。而外舅兄弟後俱成。大名顯當世子孫以之。今羅氏子姓繩繩富厚累世。非孺人之孝慈而以一死成之哉。惜都幼。十三人未能詳載。不無遺憾云。

蔣生曰。歐陽公於馮道傳。引王凝妻李氏。因旅舍主人牽其臂。仰天大慟曰。我為婦人。而此手為人執。不可以一手并污我身。即引斧斷其臂。李氏之自焚。不與同烈乎。乃士大夫當此。不自愛惜其身。如馮道者何多也。揚州陷。若史閣部可謂壯矣。而其城中乃有羅氏一門女子。人不能如史亦已耳。顧不愧此女子哉。悲夫。

管社山人紫淵楊君墓誌銘

君姓楊諱維寬字紫洲無錫太湖之濱有管社山君卜居焉因自號曰管社山人其先忠襄公諱邦乂以忠節著宋史忠襄子伯璫從高宗南渡自錢塘徙錫五傳至侍川公君高祖也侍川生隱耕隱耕生奉耕奉耕生元季諱熠元配施孺人生維正繼配華孺人生維翰維城為君同母兄維正維城皆早世維翰折居君幼失恃以季子奉父曲盡孝養父性嚴君事之無少忤疾革侍湯藥衣不解帶父歿喪葬俱獨任其事極哀盡禮人以為難君家素饒資父歿厝繁囂遂相度湖濱築牆圍池因巖架屋偕妻子讀書彈琴嘯詠自樂四方高人逸士千里來訪當事愛賢者往往折節造其廬山人意所欲賂則迎之否則曲逕巖阿雖叩門不應也初居山中寇至君出禦之賊隨手仆膽落潛遁既奉巨魁來欲復讐君仍一身出敵賊厲聲曰今來特與公較武耳君曰諾山峻險盡之平原遂俱下賊眾列重圍張火燭天湖水照灼其魁貌偉而黑虬髯執雙鉞君以一鞭左右拒鉞光閃爍旋轉着鞭聲錚錚不絕君曰壯哉忽縱身出賊背擊之賊又仆眾震懾哀號詣命去乃得安居君亦固藏其鞭誠子孫絕口不談武事性孝友潛心理學遵朱子禮立家祠日夕拜謁如定省禮祭必誠敬兩兄死撫諸孤如己出終賴以成立素儉樸終身布衣蔬食而濟人急則不計貲不苟言笑為人排難解紛片言羣服妻趙氏有賢德通經史能詩善鼓琴君於梅花小園

擁書萬卷。興至題詩。或作擘窠書。孺人未嘗不在側。出則若笠芒鞋。攜杖操漁艇。醉臥煙波。嘗語諸子曰。古來僻處山林者。皆抱道晦藏。悠然自得。若中無寶學。而惟枯槁沈溺。何以為隱乎。嗚呼。君之志何如。君之樂亦可知矣。初余偕同人訪君於管社山。舟泊湖牆。如登天際。振衣涉草徑。至蘿間。重門深鎖。良久啟關。循山根。攀蘿歷險。盤紆上高巖。乃至小齋。三楹曰潛樂堂。檻外俯臨深院。碧梧翠竹。面峭壁。澗水淙淙。下層階。臨流過湖。登山頂。轉入尚友堂。竊然以深迥異人境。俄而主人自外來。貌清癯。頎而長。脩然勁骨。雙眉直插天頂。不覺歎服。謂非斯地。誠不足以安斯人也。與客談。若遠若近。意在有無間。古所稱獨行之士。遺世特立。殆如是乎。嗟乎。太湖人所同此樂。則山人所獨。人之智愚相去懸絕。乃爾耶。山人每語余曰。某孤陋守拙。茲山所見。聞惟松風水濤。湖光山色而已。先生所聞。乃少年負氣時事。今老矣。百事退如六鷁。付之浮雲。不足以副蓋桂之性。況今日益迂腐。所志又不在此。余以羈跡寫十三經。冀事竣與君追隨湖畔以娛老。詎意君先我而去。今秋君之子白巖以狀詣袁。請余志墓。乃按狀以書其大概。君卒於乾隆丙辰七月二十五日。享年六十有三。子幾人。某孫幾人。某卜兆於管社山之陽。將以某年月日定諸幽宮。銘曰。

山中之人兮。古逸民。棄輶畧兮。究典墳。厭塵囂兮。隱湖濱。山峭削兮。水無垠。生所樂

兮死變厥身。偃然巨室反其真。

河南夏邑縣彭君蔚村行狀

君諱浚字定夫號蔚村河南歸德府夏邑縣人也按彭氏先世系出江右自君七世祖徙居中州之夏邑縣六世祖諱中美嘉靖乙酉舉于鄉高祖諱好古以丁酉舉人知直隸新城陝西同官兩縣事萬曆辛丑曾祖諱端吾以進士初入御史臺抗論時事疏數十上權倖賸落卒為中傷外補參知尋入謫籍光宗即位有詔求舊擢右通政因東林致仕祖諱堯泰熹廟時為中書舍人不附逆璫棄官歸父諱舜齡順治己丑進士司李嘉興分校鄉闈所得皆一時名儒然幾為仇東林者所傾陷及事雪補登州尋有于七之變憂勤軍務卒于官君登州公仲子也生而穎異襁褓時偶語名物再問輒指以對因舉書示以字字復然百不一誤也年十六補博士弟子員其時梁園侯朝宗太邱練石林及邑中崔正誼李萬宗俱以能文稱數公相矜率于人未嘗輕許可而君年少與之游稱莫逆交蓋文章聲價相頡頏也君具經濟才讀書識大義負至性喜好不苟同于俗登州之司李嘉興也時國事初定鎮撫士民良不易每以不得盡子職為念中書公寄書慰之曰有孫善事我能承汝志矣君奉鳩杖朝夕追隨不敢少離左右及即世登州哀毀骨立凡治喪營葬皆倚君君盡禮竭誠

巨細畢舉。登州既補任。登俗悍健訟。有疑獄株連者無算。案積日久。惻然曰。嗟乎。冤哉。吾終不忍以疑獄殺此數十人。因顧謂君汝意云何。君對曰。昔歐陽公有言。求其生而不得。則死者與我皆無憾也。乃苦心反覆詳審。卒破成案。開釋無辜。于七之亂。變起倉猝。人心洶洶。城且旦夕破。登州公躬冒矢石。而君故知兵法。得賊情偽虛實。其善畫山川形勢要害。如指諸掌。芻糧轉運相繼。居民某陰與賊通。召之至。股慄懼罪。請死。君宥之。密令入賊營。曉衆以順逆成敗利害。且曰。朝廷寬仁。司李公智勇誠信。愛民如子。必不窮治爾等也。衆勢稍懈。登州督戰益急。君預以一軍伏險隘。令輕騎訪賊。賊至。適發悉就擒。軍中初莫知其謀。登州喜曰。彭氏有子矣。賊既平。渠魁授首。其脅從盡赦之。人人涕泣。感謝曰。彭公活我。相與立公生祠。其子孫生者。必來祭祀。父母抱持拜于階下。取名以彭。俾世世不忘公。君匡贊之力為多。君性孝友。能養親志。孺慕終其身。昆弟怡怡如也。勞則以一身任之。當其從父平山東時。父以勞疾卒。君獨數千里扶輓歸。母倪恭人嘗患癰疽疾。腹中氣結。聚散無常處。發時膚如火灼。枕席不得甯。君輒撫摩達旦。既革。額天請減。算以益母。母忽甦。若有神佑。疾竟瘳。登州歿。外侮日至。君獨任勞。不聞白。諸昆季以故終身無間言。君外父郭公諱幾。早世無子。君既娶。迎外母霍太君奉養于家。數十年如一日。復為請恩褒表其苦節。太

君歿厚葬之。其天性過人。率類此。君素博洽。于國家典禮。掌故古今。事源流悉貫。凡邑中大事。人不能決者。必折衷于君。往往一言立解。先是風尚侈靡。世家子多以聲伎裘馬相徵逐。君獨屏絕。性慷慨。臨財好施。意豁如也。喜飲。友朋相聚。酒酣。捫腹劇談。千百年事。風發泉湧。輒傾四座。魏用熙者。邑中奇士也。善讀書。經史百家。諸子以至伎藝。方外之學。無所不通。貌極癯。衣冠時時垢敝。鄉人笑之。君獨受業于門。盡得所學。為文章。操筆立就。作詩豪邁。縱橫跌宕。然興至疾書之。亦輒棄去。有星家者。能言人死生禍福壽殃。期以旦夕。旬日奇中。舉國驚走。以為神。君以此中與。昏微叩之。囁嚅無以應。既而意戚戚。恐不能相容。君笑語之曰。戲耳。吾不汝厄也。拜謝去。當是時。搢紳先生暨名下士。俱心折君之學識。操行。咸以公輔器期之。而不意遂以明經老也。悲夫。君甫束髮。即事交游。以友朋為性命。初省親東下。遇樵李。其時浙閩所得士。如嚴宸臣。查王望。胡道南。吳曉岳。諸公皆一時人望。君至莫不相引重。而陳子遜。金醇。還計甫。草輩。及吳越之士。翕然欲納交于君矣。初君抱不羈之才。亦銳意進取。自登州公以東林後裔。為仇家所誣陷。臨終鬱鬱。意不克伸。君隱痛焉。乃喟然歎息曰。嗟乎。明季之禍。予先通政與商邱沈相國。侯司徒。永城練司馬。諸君子共矢大節。蹇蹇諤諤。挺身抗疏。為東林望。豈不偉哉。今子孫即因是以被讒。愚之口。夫何憾。

雖然知止不辱。吾生平雖無所表見。但求檢身無過。鄉里稱善人。死可見先人于地
下足矣。遂決意不出。嗚呼。君真可謂見幾者矣。君次子友其。字怡山。為金壇主簿。因
予先伯父綏庵公。卒卯典試浙江。聞中。與司李交最善。予以世講復相契。得詳知公
生平如此。謹狀。

韓信論

顧紹祿

古今論韓淮陰疑其欲反者什之七明其不反者什之三疑其欲反者以其有陳彭
掎手之言也明其不反者以其有辭武涉蒯通之語也以予論之不特疑其欲反固
非知信者即明其不反而不能一一指其不反之迹猶非深知信者也厯觀信傳際
可反之時握可反之勢屢矣而信終不反乃天下已定漢祚已堅時失勢移而圖萬
無可成之事此愚者所不為何況信也信當仗劍從楚數以策干羽羽不用斯時天
下豪傑並起陳涉吳廣陳餘張耳之徒紛紛舉兵信何難建號一呼聚一旅之師爭
雄角逐而獨亡楚歸漢漢以為治粟都尉上未之奇于是道亡豈不謂其時可與就
天下者楚漢而已而俱不見用世無知我則甯窮餓以沒世爾此其識甚高其志甚
固其不欲反大略可知矣而說者謂信無其資耳及漢王設壇具禮召居上坐因其
計出陳倉定三秦進兵擊魏定河東復益兵三萬人進擊趙代所遇風靡信于此時
誠如蒯通所言為楚則楚勝為漢則漢勝者苟因漢之資據有一方以距楚漢三分
可冀而信不出此其不欲反又可知矣然說者猶謂信與漢王非有深知之素因蕭
何一言拜為大將君臣相遇之隆自古未有士為知己者用信有所不忍也至漢王
自稱漢使馳入趙壁奪其印符易置諸將則漢王之猜疑已露且武涉勸以連楚蒯

通教以倍漢言切慮深及時為之未晚也。而信自以功多漢終不奪我齊猶豫不決其不欲反更可知矣。迨烏盡弓藏而陳平倡偽遊雲夢之計陰以襲信信若乘鶩發兵雖天命有歸事不必果滿然亦何至束手就縛乃明知見禽而斬鍾離昧首謁上甘載後車反覆觀之其不欲反彰彰也。安有兵既去爵既貶身居漢王掌握中轉與漢王信幸之臣步庭謀約乎無論其後陳豨之反周昌激之與信無與而視信平日謂漢王為天授非人力者彼其料事之明如畫之掌至此而頓亡故智無是理也。特是信雖無欲反之心而有致殺之道古之人臣有高天下之名建不世出之業則避禍不可不審非功成身退辭爵弗居即小心韜晦抑畏謙恭以遠讒忌否則美田宅豐飲饌肆志聲色以示無心天下令人主不疑信皆未能而怨望不平凌轢儕輩羞與絳灌並列以樊噲椒房之戚言稱臣跪拜迎送而信曰生乃與噲等為伍豈非自速其禍耶。鐘室之難所由來矣語有之功被天下守之以遜其有鑒于此哉。

明少司寇王公傳

公諱心一字純甫號元珠吳縣人萬曆癸丑進士授行人司行人。嘉廟初元試御史尋真授江西道改山西。是年九月給奉聖夫人客氏護墳地二十頃魏進忠陵工敘錄公知亂政之漸因上以義裁恩疏曰遠左破敗三軍之士臥不解衣食不重飽朝

廷慰勞存卹宜先今重念宮中之私勞輒念遠臣之疾苦流播聽聞殊傷聖德況梓宮未殯先規客氏之香火陵工告成強入進忠之勤勞于禮為不順于事為失宜忠臣愛君必防其漸臣雖欲畏罪不言不敢任聖明之顧小而遺大也上怒責之科臣倪思輝朱欽相論客氏不宜出入宮禁有旨降謫公既合臺臣具疏申救更上忠言可味疏求復二臣官謂言者一段苦心積慮不透徹于皇上之心恐聖主有納諫之資佞臣進拒諫之計則言者危而天下亦與之俱危疏入亦被降調旋起巡視蘆溝橋巡按廣西掌漕江道最後以保接忤璫御史劉大受為崔呈秀所惡削籍歸當客魏勢張鸞開宗社毒流措紳幾至移九鼎而隳七廟公早見其漸首為論列而後楊忠烈二十四大罪疏繼之迨東林六君子遞授桎梏並繫銀璫三木橫加填尸牢戶清流之禍甚于漢唐獨公以奸邪構逐棲遯故園為六君子開其端不與六君子同其禍識者謂小人之忌公適所以為公而安全之然豈公之本志哉思陵踐阼起公原官制卷京畿監武閣侍經筵益思盡抒其諫言碩畫參劾罪輔馮銓上禮義廉恥疏甄別奸黨保全善類陞太僕寺少卿差督餉兩粵事竣請終養丁艱服闋起應天丞尋陞尹時流寇張獻忠破和州蹂躪廬鳳安慶間烽火接于畿甸公至撫循綏輯舒民疾苦清馬戶黜驕遞飭江防城屬邑之無城者補軍餉之無額者士奮馬騰獻

忠覲知不攻而去擢大理卿轉通政晉少司寇旦夕入綸扉乃韓城柄國以定逆案
舊怨中公危法賴思陵知公冠帶閒住嗚呼明至思陵非不宵衣旰食慮亂憂危無
如貪濁之風成于下孤立之形見于上即有懷經協術忠義偏塞如公者痛哭而陳
發憤圖難已無能措將傾之屢絙既沈之鼎矣復隨升隨蹕置之閒散以迄于亡雖
曰氣數良由人事哉詩有之誰秉國成不自為政是可長歎息也福王立環召不起
南都失守悲慟而歿著有蘭雪堂集八卷

贊曰予讀南昌王猷定樵叟傳述魏忠賢亂政御史王公心一糾客氏及忠賢罷斥
錦衣指揮田爾耕受聞意旨使其子元蔭賂叟殺之叟陽與元蔭交陰趣御史歸里
夜乘一驢送之崇文門外御史謝曰若歸無累若叟策驢行且憤曰嗟乎袁山人一
頭何惜不為御史殉耶抵張秋風雨中痛飲泣下別去噫公之忠義感人深矣

周隱君傳

獅山之旁有山曰何山梁隱士求點葬此故名山之麓周隱君居焉君名穀字儼則
尚白其號年十八病寒兩足蹠若脫不能履地取六經史漢暨海志山經枕上吟誦
十年學用以成為詩畫無師傳超然絕俗嘗謂詩由性靈流出規規古人雖工非余
詩矣畫以韻勝摩詰北苑佳處在閒遠蕭疏後人精工嚴整去王董愈遠隨宋君嘉

難防河山左。匹馬閒行隄上。相波勢緩急。地形高窪。攷古今河流遷徙。治河得失。故與君言河道。則瞭若指掌。宋公子惟典宰嵯縣。強君往。嵯故唐剡城。地山有鹿胎桐柏。水有嵯浦。志稱溪山奇絕處。君遊屐所至。以詩紀之。詩不能達。以畫傳之。居三年。歸蓄二百金。時賃屋而棲。盡以新其屋。主者遽來取。君遂還之。人咎君妄費。君曰。吾徜徉數月。豈二百金不值耶。惟一子。娶室矣。至是卒。情不能堪。策蹇驢北上。人爭適館授餐。兩載忽思南還。行有日。戚某旅歿。君傾囊殯殮。資其柩回。素手無以歸。依吳君李方于永平。登盧龍塞。訪田疇故壘。陟望海臺。尋漢武遺踪。上馬鞭山。弔孤竹少君之塚。一日驅車出關。欲曠覽邊塞險隘。經長城墜車。車輪轉股上。股斷。遇塞外醫。置股于冰。令僵。徐剖肉視。骨粉碎。為聯綴。緝桑皮紉之。飲以藥。五日能行。舊與張涇南司寇論星辰。纏度羸縮。言相契。將薦君鴻詞科。君曰。麋鹿之性。安能就羈紲哉。束裝歸。以乾隆十一年歿。年七十一。君才思敏捷。在山左時。東平有陳將軍者。請君觀獵鳳山。仰視雙雁飛鳴。將軍曰。先生能為賦詩。某當一逞其技。因控弦連發。落雙雁于前。君于馬上作秋山射雁歌。識者以為正平鸚鵡賦之流也。

論曰。大隱往朝市。小隱入邱樊。君署隱君銜。而足跡窮塞外。朝列咸知其名。間與論兵農禮樂財賦鹽筴之源。靡不稽考精詳。疑君非果于忘世者。及觀其辭。詔遣歸棹。

頭不顧又淺之乎測君矣君真大隱者歟與求點希風千古矣

迂村子傳

今天下以便捷巧媚致身通顯羣相慕尚否者目之為迂而周君欽萊獨以迂村子自號古之名迂者唐有司空表聖作休休亭文曰老也迂然詔入洛陽陽墮笏失儀此貌為迂者也宋有蘇子美其詩曰處身介且迂乃鬻故紙公錢召妓會客除名此不安于迂者也名與實副惟迂村子迂村子絕嗜慾好讀書咿哦行途間至得意處呼之不應慕鹿門峴山之勝囊糧攜筇歷荆襄溯沔漢足跡萬山中盡探其奧嘗交遊尤畏軒冕有造之者匿身帳中若恐其攫而出也寓浙西靈隱寺邂逅歸愚子論詩合遂莫逆初善粵東方東華方外樾亭東華樾亭歿終歲愀然髮為之白晚與陳雪竇朱木為王學圃予輩三四人相酬對迂與迂契也人或隱誚之曰自彼號迂而名不彰家日削迂何益而務之君聞笑謝曰名不彰則無官守無官守故聞家日削則無營思無營思故適此迂之效也迂如故子嘗謂君君之迂信得矣迂而曰杜其將舉里之人而迂之乎君曰迂者無他不失其禮義廉恥之心而已天之生人無不具以禮義廉恥則無人不迂也何有于村噫今天下方以便捷巧媚致身通顯而君欲返之使迂真迂矣

重建西洋江樂安橋碑記

蔣衡

郡當滇粵通道西洋一江其天塹也江距郡南百里源出自板郎速部木王三川匯而成巨津盤屈奔瀉者千里而達於粵西之右江每夏洎秋雨霖漲急波濤澎湃不可渡兼地苦炎鬱瘴煙時起需次江皋者輒多病暈行旅於此望洋歎矣雍正六年太傅西林相國總制滇黔兼領西粵省道路之艱辛憫邊氓之病涉始開鑿此途特建橋一座以宏利濟第相度未協機宜適當水勢衝激之地不數年旋就圯壞迄今斷磯殘磴猶浮沈於蒼茫煙水間而居民過客之經此者指其遺跡溯厥前規猶追思之弗置乾隆十有七年歲壬申秋九月余奉大憲奉請調移茲郡自維謫陋不逮前賢遠甚而於民間疾苦地方利弊以及一切應行修舉事未敢不殫心籌畫期以不負職為兢兢抵任之初適奉恩詔凡橋梁道路所在有司各以時修舉余伯父比部方棧公在籍獨力捐辦御蹕臨幸大路計費白金三十餘萬兩好義之名聞於四海余自是益加奮勉自城垣營舍及祠廟壇壝之有關祀典者既率僚屬各捐貲次第葺治而西洋橋工所由亟為經理也廣郡處邊徼而路屬道途商旅運至非此橋無以便其往來且澤不陂川不梁政之弛也民嬰瘴癘道暍時聞守土者之恥也爰親詣江干營度形勢或云仍舊基可則前鑒非遠或云運舊石補新工易則

挽運為難。迺去舊基約一里。測水勢之平緩。度山形之延屬者。先立表以定位。復溯江而上。擇不害民曉山之多骨者。為採石地。行不二里許。則有竹樹蒙茸。嶙峋骨立。臨江而衝激者。余顧而喜。此天之所以綏我蒼黎。供我取材也。遂諏吉祭告山川。而鳩工聲役焉。役興。余捐俸倡始。並選同城僚屬暨紳士之好善者。各量力出貲以助。而專其責於僮丞。振裔。俾董厥成。率皆踴躍樂從。一時各揭成帑。鉅鑿皆興。鉅鑿登登。噓呷上下。恍與激湍飛瀑相響。奮也。役始於乾隆十有九年甲戌四月。訖於乾隆二十年乙亥十月。凡十有九月而竣。計長十四丈。有奇。寬四丈。高四丈許。下設環洞三墩。位四疊。累以萬計。工倍之前。後需費共約二千五百餘緡。此皆賴襄事諸公同心協濟。吾民亦克用勸。相與有成。其爵里姓氏另碣詳鐫。弗敢掠美也。從此長虹遠跨。駭浪不驚。瘴雨清。炎飈遠。俾往來是路者。登梯拾級。如歷莊衢。上以昭王會車書一統之盛。下以繼前賢康濟未竟之心。不亦休乎。橋兩岸樹坊以旌者。地自宋始入中國。為特磨道古邕州編管。昭所自也。橋名樂安者。余族姓故出樂安郡。而茲橋特倡於余。誌厥成也。且願商民之涉足於是者。羣樂其業而安其居也。

馬市圖序

周天度

馬市圖一卷。蓋故明萬曆時筆也。載宣府來遠堡貢市。拓中為城。旁肖紅崖甯靜諸山。俯瞰梁機。城中有臺翼然。朱衣危坐者。青方袍。左右侍者十許人。青袍坐別幄者四三人。環城睥睨。甲楯立者可百人。曼胡之纓。短後之服。弓刀森植。意狀閑整。臺下軍吏數曹。長跪白事。規方墺地。百貨呈集。車廬馬駝牛羊。旃旄布繒。坵壘之屬。踴躍跳丸。意錢捕博之技。畢具其外。穹廬千張。隱隱展展。射生投距之倫。莫可名數。蓋一時之盛也。嗚呼。當嘉靖之季。北部最強。比年深踐宣大間。大入則大利。小入則小利。士救死扶傷。不給。戰守益習。於是邊郡蒸然稍有起色。迨隆慶改元。俺且內讐。王襄毅因其降息。建和戎之助。方是時。新鄭當國。中外多言不便者。政府獨違眾聽之。蕃部亦厭兵就餌。歷穆神光。熹四朝。北邊最號無事。雖然。當有明諸公。但知保疆休士之功多。而不知狃安玩敵之弊大。但知灌燧銷燧之謀遠。而未審坐甲忘戰之患深。傳曰。善作不必善成。非虛言也。方襄毅之初建市。議曰。朝廷若允俺且封貢。諸邊有數年之安。可乘時修備。設敵背盟。吾以數年蓄養之財力。從事戰守。愈于終歲奔命自救不暇者。是襄毅亦知款之不可狃。而姑為權宜以紓近憂而就遠計。異時枋國之臣。苟以燕閒之時。申固不拔之計。簡軍實。飭戎器。厲武守。常以敵之不至。使我有

以待其至則封疆之事無弊可也乃觀有明之政一切不然朝廷好以空名警遠至於斗粟尺帛濡忍而勿能予疆吏則始為苟且訓練服習之方怠廢而無所事而一二不諳政體言事之臣朝夕以減撫賞核市值為得計使信輕失於遠人以肅寇愆中朝殷算猶倚其富盛日勤遠略援遠戡播禍挈不解軫門庭之憂忘腹心之疾亦幸而搶卜諸人再世不競故勉就戎索耳萬厯四十年懷甯汪公道亨來撫宣時邊事日竊已無可為者公欲振其積弊稍稍繕葺城堡講宿儲備觀其論關餉上執政諸書至可哀痛而卒無如盈廷之泄泄也夫宣府天下之雄鎮而神京之近畿乃數十年間戎政液解士不飽半菽上罔卹而下日離凌夷至于崇禎末造流賊以鐵羸創殘之餘躡陽和陟居庸重臣世將連脰就戮怨軍驕帥搏顙恐後鼎之扞強敵而有餘者今則摧弱寇而不足何勇怯殊歟亦積漸之勢然矣來遠堡築于萬厯四十年一年圖之咸當在其後計爾時市局將變圖猶若誇示大國之威重物力之豐溢者迨熟觀其設色布指將使後之人得其意於毫素之外豈亦殷憂深戒託于輒喻者為之是未可知也夫一圖之小不足置論余特感於有明疆場之事不惟繫一方利病實則天下後世龜鑑也圖高四尺袤五尺卷絹寫今存某處月日統

滿城縣屬保定治郡之西。滹河之流自西來者至邑而淤淤而復出。播為泉曰一畝。曰雞距。合而東南流為奇村河。又東入清苑境為府河。即志所云清苑河也。河自西而東入于滹以達于淀。自奇村至清苑。沿河之村。墮百畝。藉河之力以資灌溉者。農田百畝。而自府河東達津門。商賈望走郡下方舟逆軌。莫不于是仰縱。閑為奇村之河。既首受二泉水。顧泉之力微。則下流之輸瀉益薄。農作灌溉無所資。即自府河以東。日規堰儲。而舟楫往來益梗隘。不可遽達。故泉之衰旺。其迹著于滿。而利之所由興與弊之所伏。不盡繫乎滿也。往時余行部過其地。周歷泉所。語僚屬曰。凡水之狀。脈而支分。其復出之。必非一二足也。榛莽之區。礪磧之土。宜有於遏而未顯者。盡訪諸歲壬申。吏有來告。邑之東得泉焉。蕪漑沮洳。棄于葭藪者舊矣。所司具畚鍤。召丁役。激之滌之。源茁而深。流疏而清。滹淪演紆。視一畝所鍾。大倍十計。而泉之左右。復有諸小泉。舊聞而湮者。曰五花。曰連甕。曰紅花。皆次第以修復。告乃引之為河。河長一百七十丈。則醴為渠。渠受小泉水。率一二百丈。凡河為經。凡渠為緯。咸注而入于奇村河。河之上舊有閘曰響水。凡新泉及諸小泉來入者。至是畢會于是。益信嚮之專藉一畝雞距者。為得其半。遺其全也。河兼眾水。其流盛大。數倍于昔。村墮之土。夙宜秔稻者。亦數倍于昔。而自郡以東。橋檣雲集。方春夏之交。百物接于衢。四民萃于

市歌舞歡作。欲不尸功于茲泉。不可得已。嗟乎。一事也。使有利于一方之人。道民務者。猶將舉之。矧舉之而所及者衆。所施者遠耶。有修有廢。其修之則人謀協也。余烏知後之修廢何如也。工既竣。爰伐石以紀之。泉故無名。余名之曰申。且繫之銘曰。帝營九州。神畿是崇。列郡環之。保為距雉。滿邑于西。兼望緊要。清流灌輸。四國是攸。迺醴迺園。迺耨而耜。烝徒駉駉。厥用殫微。我行其野。目不暫捨。爰諮爰謀。于邑之下。爰有間田。汨渚昏漫。沈泉冀出。吏走相告。迺度土功。既闢既除。去其不蠲。其行舒舒。別藩五花。連寶底績。紅花婉孌。如滕從嫡。衆流氤氲。達于奇村。孰多前功。視此塙垠。歲行在申。申堅萬物。原泉胚渾。敷土遂出。十二辰次。申維兌鄉。廣洲重登。澤我羣毗。言揆厥時。辨正方位。名以銘斯。以涖成事。

楊國聲傳

公諱國聲。字廣譽。西崖其號。漢太尉震之後也。其先宏農。遷延安。又遷晉之洪洞。明成化壬辰。進士官翰林洗馬。贈戶部侍郎諱傑者。又遷平定州。遞傳至進孝。達宣府萬全衛。遂為直隸萬全人。進孝公生二子。長曰龍無嗣。次曰處士。咸公考也。處士公初艱於息撫嗣子芳聲。仕至浙江紹興府知府。最後乃舉公及公弟英聲。方是時。處士公年已六十餘矣。公生有異徵。弱不好弄。髫年出塾。誦習恆兼人。方一星終。處士

公遽捐館舍。母劉太恭人如樂啖冰。母兼父道。公益自刻厲。年十五補衛博士弟子。員康熙二十六年。以高等受知於學使者福山李公。應薦遂以明經入太學。三十一年補正黃旗教習。屢試京兆。不遇。乃循年例需次。遂曹。康熙五十年。除知浙江湯溪縣。事縣居兩浙上流。民彫俗劫。公甫下車。問民所疾苦。務與為休息。凡利弊興除。知無不為。最其大者。革閭糧之無藝。卻過山諸陋規之巧取。其為德於湯民者甚厚。五十六年九月。例轉湖廣彝陵州知州。彝陵當三峽要衝。為楚蜀門戶。難治。什伯於湯。且自滇逆煽亂。人戶流亡。田無定賦。豪族猾胥。因緣為奸。窮民膚剝髓枯。甚至鬻子女以償無產之稅。呼號之聲。家十而九。公蒞任後。悉心鈎稽。履畝正額。數十年積弊。一剷其舊。他如革行戶。免夫差。凡不便於民者。務絕厥根。不以因仍自貸也。長楊縣民不協於令。聚眾阻嶠。幾成不測。大府檄公往。公單騎入。為開陳大義。民皆涕泣自投。立時解散。歲丁未。江陵大饑。令以賑務得幸去。公往攝篆。多設粥以活餓者。不侵不瀾。雁戶帖然。前後三月。所全活者數萬人。無何大隄潰決。公受委分修。晝夜庀度。千畝萬鍾。雲集霧會。隄成屹然。稱保障焉。雍正五年。內陞京府治中。八年。轉刑部貴州司員外郎。殿庭召對。天語褒嘉。十二年陞本部湖廣司郎中。公歷外任久。獄情誠偽。無不周知。又涖職精勤。不使吏胥上下其手。是以廉平之譽。雖威尉之惻怛。

于公之無冤無以遠譬也。方公任彝陵、荊州守某，素與公睦，既而請求不遂，睚眦于公。風動草搖，百毒齊起，賴大府深知危而獲濟。然猶譏公倖者十許年。及公在西曹，守以他事落職，方謀渝雪。故事廢員開復，必由刑部覆奏可否。始聽銓除，乃函書謁公，陳其冤狀，同列知其事者，謂公宜白之當事，以釋宿憾。且可因以為名。公慨然曰：「危人以自利，吾不為人窮而更擠之。吾不忍吾惟視事理之曲直而已。」已而守竟得賜環，人咸目公為長者。乾隆元年，以疾引年，予告歸里，踰年而沒。嗚呼！公自通籍垂三十年，由縣令、州牧、歷職曹郎，俸入之餘，脂膏不潤。家本素封，因官而落。江陵之賤，長隄之役，捐墊各數千金，私囊不給，繼以舉息。迨解組歸田，舊時恆業鮮有存者。無身之日，家無長物，室無羨資，故宅一區。子若孫棄以予人，僅畢喪葬，視世之囊帙積金笑語秩終者，真不可以道里算計也。公子鉉，原任廣東海豐知縣，有循聲。孫二，文灝，雍正己酉舉人，文濤，乙卯武舉第一人。

論曰：嘗讀唐孫樵書，何易于益昌事，而歎世無知者。以視楊公楚越之治，何如哉？君子遭遇明時，位不究用，古今人非盡不相及也。若夫捐棄宿嫌，不乘人以防此賢者所難，庶幾張季直不疑之風，懿哉篤行自治之徽烈矣。

重葺邵文莊公祠堂記

顧光旭

邵文莊公祠舊在冉涇故第。門人莫僉事同華郎中雲設像其中。祀焉。萬厯間。蔡觀察獻臣修其家祠。并葺二泉書院。顧端文公爲之記。國朝順治中。張學使能麟重葺二泉書院。乃移像於超然堂。公祠之在惠山。始此。乾隆間。知縣吳鉞復修之。二泉書院者。本公退休時所爲。尚德書院。嘗祀宋丞相李忠定公於堂。與子弟諸生以時釋菜尸祝而俎豆之。蔡觀察并而葺之。其猶公之志也。自李裔移忠定像別爲專祠。今又百餘年矣。夫世有古今。事有興廢。其歷久而不敝。閱世而常存者。亦曰道而已矣。粵自文靖載道南來。喻尤既往。小山實齊。絲絲延延。不絕如綫。公出而紹龜山之令緒。傳忠定之遺休。繼往開來。毅然以道自任。忠以體國。孝以教家。是必先有敝蹤。軒冕土苴。金玉之心。而後天風海濤。研朱滴露。點易其中。無入而不自得也。於戲。此其意殆未易求諸三代以後矣。惟顧高兩先生知之切。而私淑之久也。故道南之脈。於茲未墜。然則公之仔肩於大道。有造於後進。實吾邑守先待後之一人。韓子謂孟子之功不在禹下。公之功豈在孟子下乎。今滴露泉點易臺。海天亭諸勝。鞠爲茂草。而訪其故墟。尋其遺跡。山中之人。往往指某處爲臺。某處爲榭也。此即公之至今存也。惟公之靈在帝左右。而神所憑依。當有陟降於斯。而浩然長喟者。此則超然堂之

一新再新。為後死者之責。必無可議也。光旭一再過之。怒焉如擣。爰告同人。集賢五百。繕鳩工庀材。經始於己酉六月十三日。閱兩月落成。蓋公之德彰矣。昔者泰伯至德而無嬖嗣。至於今天亦若斯之者。伸於彼而詘於此歟。抑有數存焉。天亦無如何耶。光旭猶有感焉。公之言曰。願為真士夫。不願為假道學。何為假道學。語曰。無為小人儒。此公孫宏張禹孔光之流。楊雄馬融之輩。所為竊儒以終身而流於無忌憚者也。若是者。公深疾之。孟子曰。五伯假之也。謂假仁義也。然假仁義者。猶見諸實事。假道學者。但竊其虛名。故公尤疾之。而不願人之為之也。光旭於道茫乎其未有見。因公之言而推公之意。得毋謂是乎。然則所謂真士夫者。非居天下之廣居。行天下之大道。得志與民由之。不得志獨行其道者乎。祠成。將與諸同人以時享獻。登降於公之庭。敢以是說質諸公而告來者。

校刻逸周書序

謝墮

周書本以總名一代之書。猶之商書夏書也。自漢以來。以所傳五十八篇目為尚書。而於尚書所載周書之外。以七十一篇者稱之為周書而別之。劉向以為孔子刪削之餘。第漢志載周書七十一篇。即列於尚書之後。而總繫之以辭。則究未嘗別之於尚書之外也。至隋志始降列雜史之首。以為與穆天子傳俱汲冢書。然漢志未嘗列穆傳。則其非出自汲冢可知。不當牽合。愚嘗玩其文義。與尚書周時詰誓諸篇絕異。而其宏深奧衍。包孕精微。斷非秦漢人所能彷彿。不第克殷度邑。為龍門所引用也。明堂見於禮記。職方載在周官。其文雖小異。要不足為病。而箕子月令。想即洪範呂覽所傳之文。周史所記載者也。惟其闕佚既多。又頗有為後人纂入者。篇名亦大率俗儒更易。必有妄為分合之處。其序次亦未確當。如大匡為荒政第四卷。王在管時不當復以名篇。且文內大匡中匡小匡。意不可解。時訓似五行傳。謚法與史記正義大同。殷祝雜出殷事。與王會篇未成湯伊尹語。皆為不類。若太子晉一篇。尤為荒誕。體格亦卑弱不振。不待明眼人始辨之也。愚謂是書文義酷似國語。無疑。周末人傳述之作。其中時涉陰謀。如寤微之歎謀泄。和寤之記圖商。多行兵用武之法。豈即戰國時所稱太公陰符之謀與。時蓋周道衰微。史臣掇拾古訓。以成此書。始於文武而

終于穆王厲王也。好古之士所宜分別觀之。立乎千載以下。讀千載以上之書。而猶執篇目之多寡以繩之。豈不誤哉。

重刊荀子序

荀子生孟子之後。最為戰國老師。太史公作傳論次諸子。獨以孟子荀卿相提並論。餘若談天雕龍炙轂及慎子公孫子尸子墨子之屬。僅附見於孟荀之下。蓋自周末。歷秦漢以來。孟荀並稱久矣。小戴所傳三年問。全出禮論篇。樂記鄉飲酒義所引。俱出樂論篇。聘義子貢問貴玉賤珉。亦與德行篇大同。大戴所傳禮三本篇。亦出禮論篇。勸學篇即荀子首篇。而以宥坐篇末見大水一則附之。哀公問五義。出哀公篇之首。則知荀子所著。載在二戴記者尚多。而本書反或缺佚。愚竊嘗讀其全書。而知荀子之學之醇正。文之博達。自四子而下。洵足冠冕羣儒。非一切名法諸家所可同類共觀也。觀於義兵篇。對李斯之問。其言仁義與孔孟同符。而責李斯以不探其本而索其末。切中暴秦之弊。乃蘇氏譏之。至以為其父殺人。其子必且行劫。然則陳相之從許行。亦陳良之咎歟。此所謂欲加之罪也。荀子在戰國時。不為游說之習。鄙蘇張之縱橫。故國策僅載諫春申事。大旨勸其擇賢而立長。若早見及於李園棘門之禍。而為厲人憐王之詞。則先幾之哲。固異於朱英策士之所為。故不見用於春申。而以

蘭陵令終則其人品之高豈在孟子下。顧以嫉濁世之政而有性惡一篇且詰孟子性善之說而反之。於是宋儒乃交口攻之矣。當即言性者論之。孟子言性善蓋勉人以為善而為此言。荀子言性惡蓋疾人之為惡而為此言。要之繩以孔子相近之說則皆為偏至之論。謂性惡則無上智也。謂性善則無下愚也。韓子亦疑於其義而為三品之說。上品下品蓋即不移之旨。而中品則視習為轉移。固勝於二子之言性者矣。然孟子偏於善則據其上游。荀子偏於惡則趨乎下風。由憤時疾俗之過甚不覺其言之偏也。然尚論古人當以孔子為權衡。過與不及師商均不失為大賢也。此書自來無解詁善本。唐大理評事楊倞所註已為最古。而亦頗有舛誤。何知同年盧抱經學士勘核極為精博。因從借觀校士之暇輒用披尋不揆構昧閒附管窺皆正楊氏之誤。抱經不我非也。其援引校讐悉出抱經參互攷證。往復一終遂得藏事以堦謫陋誠不足發揮儒術且不欲攘人之美而抱經頻致書囑序。因舉其大要略綴數語於簡端並附著書中所未及者二條於左云。

姜上均徵君鄉賢錄序

吉夢熊

周官大司樂凡有道者有德者使教焉死則以為樂祖祭於瞽宗鄭康成謂先師之類若漢禮有高堂生樂有制氏詩有毛公書有伏生此雖臆斷之辭亦可知漢時專一經者即臚於祀典後世文廟旁別立鄉賢祠以祀鄉先生之有道德文章者蓋猶仿古釋奠先師之遺意顧其敝也重名位而不必盡洽於鄉評則又疑於濫矣今天子表章儒術風示人倫飭大吏以鄉賢列奏牘者必慎重其選堂哉皇哉俎豆之光也同里姜上均先生說經鏗鏘自其立年鑽研三禮之學受知於西林相國天子御極之元年徵天下通知禮經者入禮館纂修三禮西林以先生薦編摩既就予以優敘生有稽古之榮矣既旋里居白鶴溪之藤村仰屋梁著書自三禮之外尚書春秋公穀爾雅孝經以次排纂凡傳註合者引用原書其未合者附以己意句梳字櫛書成自題曰九經補註謂補朱子之所未註也曩夢熊同先生族孫元起元章交先生以東牕睡覺圖致元起昆仲所屬夢熊題句為賦七言古詩一章先生心愛之因別錄所著就先生是正先生丹黃決擇迄今將二十年所手擇猶新藤村距郭門六十里猝難合并會先生以姜氏祠事詣元起所居宛委山堂即明宗伯鳳阿先生註經處也至則先生走使告夢熊就見時夢熊方弱冠先生皓然七十餘長身鶴

立。裁冠矩步。序主客禮。坐定。為指陳九經註畧例。因述朱子輯易本義詩傳四書章句。能集諸儒之大成。粹然一出於正。然其時多有師友緒論。及門弟子辨難。以故書成無悔。而予僻處荒村。孑然一身。考定校讐。悉由獨力。其中保無踏駁。先生虛懷盛德如此。先生又言。往在禮館。盡心編纂。而集議紛紜。與望溪方氏論周官。多不合。如方氏據書望於山川。釋四望為山川之祭。予謂大司樂四望與山川異樂。典瑞四望與山川異玉。鄭氏既釋為五嶽四瀆。兼舉司中司命風師雨師。蓋從許慎天神地祇。舊說宜若可從。方氏又言。春人序官。奄二人。恐不給六宮之用。意周室后夫人節儉躬率嬪御。任春榆之事。予謂司厲女子入於春臺。係罪人不可限以數。甯寡母多。本職奄與女奚止九人者。約舉之詞耳。王后以陰禮婦職。統嬪御。安得自任春榆。諸如此例。日有數端。然予言出而方氏究無以難也。夢熊謂先生方氏以古文名世。其周官辨惑諸書。凡典禮不見於他經者。輒目為散莽竄入。此其果於自信。得先生鍼起之良。是時癸亥孟冬語也。後夢熊貢入成均。交國子先生鍾勵。暇暇於方氏稱弟子。熟於三禮。故與先生同館修書者。真為夢熊言。館中寅入申出。纂輯羣書。無如姜先生之勞瘁者。析表眾說。亦無如姜先生之博辨者。是當於古人中求之。先生不苟同。而能取信友朋。又如此。逮夢熊甲戌南歸。而先生墓有宿草矣。嗚呼。姜氏自鳳

阿先生以詞臣起家殫心著述所撰有周易解義六卷周易補疑十二卷春秋事義全考二十卷春秋讀傳解畧十二卷里中後進罕覩全書先生踵武接跡而卷帙倍徒過之可謂勤矣古者鄉先生歿而祭於社如先生者歸然耆碩著書等身為藝林矜式

天子尤大吏之請從祀鄉賢比於詩書禮樂之師此鄉評之所歸而國家祀事之所以協於古義也先生中康熙庚午科舉人謁選得楚令未之官充三禮館纂修自九經補註外尚撰有詩易述蘊共八卷家語孔叢子注共十五卷姜氏族將萬人以先生孝友忠信奉為祠正乙丑年八十卒於家其文孫蕪留畬經訓能讀先生之遺書丁丑歲

天子南巡夷以先生書進行在拜文綺之賜其請祀鄉賢也夷重趼告於大吏既邀恩命夷恭錄諭旨并所司文檄奏稿都為一集題曰鄉賢錄而以四方友人投贈詩文附於卷末以序屬蕪熊爰序其錄起如此

送畢秋帆庶子任鞏階秦道序

經術所以經世務也繁劇之地事幾之博自農田水利學校兵防之設以及剛柔燥溼好惡取舍之宜惟有學者能達焉學而不遠無貴學矣故曰誦詩三百望其遠於

政也。畢君秋帆以庚辰臚傳第一人受

天子眷遇。洊歷宮僚。擢在講幄。朝士望若景星慶雲。

天子欲其練習民事也。授以鞏階秦道。君自此可益展所學矣。僕惟隴西安定之間。班史稱其迫近戎翟。修習戰備。高上氣力。漢興六郡良家子。選給羽林期門。以力為官。名將多出焉。今

天子文經武緯。八荒我闡。烽燧不作。禮讓風行。猗與盛矣。君至其地。統帥僚屬。宣揚德意。必更有因勢利導者。僕其能有以益君乎哉。僕於庚辰奉命入闈。與錢穀堂太史分閱春秋卷。君出教堂之門。而以僕同校一經。執弟子禮甚恭。僕將何以益君乎。僕聞外者內之符也。己者人之表也。以君學有經法。通知時事。相地方之利病。而興罷之。不以一衣擬寒暑。不以一藥治瘕瘕也。審事體之幾微。而戒守之。善不謂小而無益。不善不謂小而無傷也。僕觀近代如湯文正公。甫以立年由詞臣任潼商憲副。蒞事之日。抑鋪陳行保甲。設耕屯。建義倉。講鄉約。興社學。舉善疏美。不勝書。而其申明敬戒也。則曰上畏闕書。下畏民巖。可謂學而能達矣。自後公遊孫徵君之門。講學益遠。再入翰林。以清名介節。上結

主知。外膺節鉞。內掌冬官。屹然為我朝名臣。而其始基則已見於潼商所設施矣。

君之年與文正任澶商時約畧相似。又鞏階秦與澶商同一省治。經其故處。考其遺蹟。具有不相謀而相合者乎。是僕之厚望於君者也。君之行也。僚友多為詩以贈。僕取古人不頌而規之義。而為之序云。

陶氏洛山墓田記

錢載

秀水北有金橋。縣治北二十五里有水曰雁蕩。宋之南渡。扈蹕而來者。有陶氏家于金橋。元已延兵南下。德祐詔勤王。陶氏有菊隱者。散家財。集鄉勇。以拒戰于橋下。其潰也。室廬盡焚。乃避于雁蕩。宋亡。結村屋曰忠孝堂。已延物色之。乃遷于杭州之洛山。其地兩山相對。菰水西來。橫貫而東。外祖家蘇姓居其間。乃姓蘇而依其居。挈其子君疇耕田于山之下。水之上。其沒也。負山面水以葬焉。今其墓林五百年矣。中為蘇太公提舉墓。則仕于宋而陶之外祖非邪。左為菊隱暨君疇墓。則陶而附于蘇也。右為三女師墓。則陶女適亂不嫁。為尼。所謂淳正安道明真者也。嗚呼。陶氏菊隱之艱貞。其元之頑民。與其宋之義士也。杭州府志。義士陶菊隱墓在洛山。錢王潭左。嘉興府志。陶菊隱與趙孟頫。殷澄稱秀州三義士。洎世之平。其孫允中宜中始歸於雁蕩。遂以山中田奉墓下祭。夫塋墓之棘荆荒蕪。土田之汙萊侵奪。高門右族所不能無。于是陶墓之田。蓋屢廢而屢復矣。其復于明宏治間者。雁蕩之子孫措照勸也。其復于崇禎間者。曰發元。果廷煜也。已而兵亂。暴客踞其地。本朝順治十有六年。曰發泣白于當塗而歸之。百餘年來。又蝕于他人。乾隆三十有三年。曰發之孫寵綬。又力復之。今洛山蒼蒼。山下田七十畝者是已。嗚呼。三義士也。五百年以來。陶且若是。

而尚未艾。我不知趙殷之墓。何山何水。而其後何人耶。吾知天之必無靳于趙殷也。孟佃號月麓。宋宗室。家黃巖。文丞相開闢江東浙西。俱辟以行。元兵執孟佃而欲官之。乃避居于嘉禾。澄字公衡。家華亭。元將楊埽地欲屠其境。澄仗劍叩軍門以死爭。而境獲全。已廷授之軍民總管。乃避去於泖上。嗟乎。牛山同盡。然當其未盡。不可使之盡。吾豈敢謂忠孝節義。其人之必無窮哉。夫天道固有可知。有不可知者。已。菊隱佚其名。

戚連江家傳

君姓戚。內諱發。言。字魏亭。一號研齋。父以賜研昇之。即自號也。先世浙江東。其遷德清。自諱鄉者始。七傳至君。父諱麟祥。歷官翰林院侍講學士。五子。君其次也。生而嗜書。襁褓號笑。見書輒止。及就外塾。不煩講釋。曉徹大義。翰林胡彥類。吳家驥。皆其師。學士所交。如徐用錫。陳鵬。年輩多碩德鴻才。君幼侍得聞言論。博覽載籍。康熙己亥。補縣學生。庚子。舉于鄉。主試臨川。李紱。浙之名榜也。是歲。學士以事謫戍甯古塔。君乃隨侍戍所。聞之甯古塔。去鵲哥關一千八百里。其地有一土阜。初名之特。後轉為臺。再轉為塔。固無臺無塔也。掘地得正隆錢。或謂即金之天會府。寒暑不時。與內地異。君既扶侍久。學士遣之會試。雍正庚戌。與仲兄振鷺同登進士。是科一甲皆浙

人周霽沈昌宇梁詩正也。而君以奉旨派福建學習具時有進士學習知縣例。遂知連江縣事。連江叢山環海。故多虎。亦多盜。君嚴法捕之。盡於是勸農桑興教化。編保甲。務相感以誠。相說以信。賦惟正供。訟無留牒。又設普濟堂育嬰堂義冢。濬城河。凡以贍民之生而恤民之死也。乾隆丁巳山水發。大風雨。縣治且溢。八月拔蛟颶不止。南門水高丈餘。君肅衣冠拜禱。風止水勢定。於是上請捐銀穀賑貸。並請捐田賦。其水所衝陷者。得永蠲除。明年又饑。募巨室捐米平糶四旬餘。民以活。嗚呼。斯亦足以徵其治行哉。縣有東湖。隋開皇間。義士林堯捐田。積水所成。隄之以溉田四萬餘頃。千餘年矣。侵占淤塞。上滕崩豁。洎水災後。內隄蕩然。外隄復決。開二十餘丈。君亟上請。乃加石築土。修二百四十餘丈。廣四丈。隄成。上植桃李雜樹。下種荷蕖。立祠以祀林堯。民歌誦之。又修學宮。設義學。修縣志之修于元而久不修者。連江之人方樂君之靡事不舉而相與為連江幸也。

皇上初元。恩旨敕還麟祥。君益感奮曰。彼言其何以一心報國乎。將迎養。罄棄遺弟朝桂歸。畢諸婚嫁事。於是築室三間。聚書其中。以迎養其父。連江人曰。吾侯孝子也。庚申冬。學士病劇不起。君居喪幾毀。蓋自庚子以還。奔馳鬱輻。積患嘔逆。至是扶喪歸。營葬未成而疾大作。以沒。四十有四歲。連江人聞之。相與率私錢祠其侯於東。

湖之上。嗚呼。君之一生。可不謂難乎。其於道也。蓋庶幾哉。今歲辛亥。其家乞按其子更生所具行述作傳。以俟族譜之收采。

吏部文選司主事康古汪君墓誌銘

君之歿二十二年矣。予今八十四歲。乃為誌墓。人生百年。何予之于朋友。一倫流涕。無盡也。傷哉。君家故饒。至于君獨貧。君才早慧。讀書最多。謂當大有用于世。晚甫一第而不壽。嗚呼。君旁通陰陽數術之學。孔子罕言命。又曰。不知命。無以為君子。孟子謂得之有命。孔子曰。有命。孟子謂得之不得。有命。聖賢輒言命。豈有外于君所推之。路。球術耶。予于里中。君前一輩人。哭生明府沛然。陳明經向中。祝典籍維誌。則君之舅氏而外舅也。同君一輩人。則哭王比部。又曹萬孝廉光泰。君弟孝廉仲鈞。明經又辰。此豈予之命也耶。自君身後。諸郎科第仕宦。皆不若君之身艱難。今葬之曰。子男四。孫男十七。曾孫男四。女三。女八。女五。此固君之命然哉。君姓汪氏。諱孟錫。字康古。號厚石。浙江秀水人。先世休甯。國初來遷桐鄉。曾祖考森。桂林府通判。戶部江西司郎中。誌授中憲大夫。有小方壺存稿。粵西通載若干卷。妣黃氏。封恭人。本生曾祖考文桂。內閣中書四舉鄉飲賓。誌封奉直大夫。有鵷亭集。妣黃氏。封宜人。祖考繼燦。鵷亭次子。後于弟森。康熙戊子舉人。歷官吏科給事中。巡視臺灣。妣張氏。

考上境歷官大理府知府。妣祝氏。皆誥授奉直大夫。封宜人。大理四子。君其長也。大理教子嚴。宋儒理學之書。皆自授之。雍正乙卯。為娶婦。即祝宜人之女姪。蓋大理惟及為家子娶婦。其諸子女。皆君于父歿後。為弟昏而嫁其姝者也。乾隆元年丙辰。君年十六。侍母從父官。咸京入官京師。辛酉母歿。君扶柩攜弟歸里卜塋。葬母于海鹽山茶花漾之原。乙丑大理出守。遣家歸。丙寅大理卒于官。君奔迎柩歸。合葬于新阡。休甯之汪。皆祖唐越國公華。遷桐鄉者。至君始以進士起家。既官中書。謂身已食祿。所受產。悉以畀兩弟。又辰彝銘君之子。父母弟姝。不能不謂其孝友也。桂林裘杼樓藏書甚富。皆借鈔于江南故家。同里則倦圃曹氏。竹垞朱氏。予嘗共君言書。且無論其聚。見即可矣。君之于書。豈止見也哉。壬戌癸亥甲子間。君及弟仲鈞。字豐玉。同余于小方壺萬卷之儲。豈止觀其大略。丁卯。余客京師。庚午。君與豐玉同舉于鄉。而豐玉年未三十。以癸酉歿。嗚呼。才與命相。姑蘭摧玉折。其奈之何哉。自後君為稍操舉子。蹭蹬名場。中間支離藥餌者。且十年。嗚呼。讀書之有命也。又誰謂不然哉。所著古文辭經術金石雜藁。未整理。其已刻者。厚石齋詩集十二卷。豐玉桐石草堂集。萬孝廉集。君序而刻之。嗚呼。嘗謂吾黨諸子。皆不壽。其詩之已刻者。若王比部丁辛老屋集。萬孝廉柘坡集。君及弟豐玉集。陳明經毓恬匏村集。雖莫信其必傳。然異

日采乾隆間詩不能舍此數家不收也則其可傳者信在是已君以乾隆庚午舉人
壬午春恭遇

聖天子三舉南巡趨赴常州恭進迎鑒詩龍井見聞錄十二卷得旨留覽賜
緞二匹召試入選授內閣中書丙戌成進士仍官中書轉典籍升吏部文選司主
事恭遇

慈壽覃恩 誥授奉直大夫後以子如藻官恭遇

萬壽覃恩 誥贈朝議大夫生康熙六十年九月十四日卒乾隆三十五年閏五月
二十八日享年五十君之古如蓮葉微有痕若將分瓣然吾未見有二也其來蓋有
自哉君辦事內閣即充方略館纂修又御批通鑑輯覽平定整噶爾方略大清
一統志皆身兼其事君約身以儉同儕譏其儉不中禮則固兩失于偏矣君之得于
天者未嘗不厚然亦未嘗不薄也使不若加折挫然而稍申之壽則所出入敷布儒
者之效豈不遠且大哉元配祝氏秀水內閣典籍候補主事維誥女 誥贈宜人晉
贈恭人孝子舅姑勳識大體祝自明虛齋先生萃歸田講學輩出聞人女子而有舊
家風範若恭人者惜其無年耳生康熙五十六年十月十八日卒乾隆九年八月十
七日年二十八繼室金氏仁和乾隆壬戌會狀禮部侍郎姓女 誥封宜人晉封太

恭人其稱未亡人也二十二年間成就諸子大有造于家生雍正八年四月十三日卒乾隆五十六年八月二十四日享年六十有二今以乾隆五十七年十一月七日合葬于桐鄉縣永新圩之原子四如藻祝氏出乾隆乙未進士翰林院編修出守撫州升興泉永道未赴丁繼母憂如洋金氏出乾隆庚子恩科會試第一名殿試第一甲第一名賜進士及第翰林院修撰上書房行走為仲鈞後君先以如澈後仲鈞殤復以如洋也如潮妾范氏出直隸武清縣丞范氏生雍正十三年七月初十日卒乾隆二十六年七月二十八日年二十七如淵金氏出嘉興府學生其合葬也元配繼室妾祔一穴四兆銘曰

曠野無山兮水流東千秋白日兮長掩封

處士張蒿庵墓表

聖朝天地之德之大物物涵煦以生長成遂其間之以處士自見者類如江南之顧絳山西之傅山康熙己未以博學宏詞薦而一辭一不至臃腫拳曲之木實密雨露以遂其山澤之生山東濟陽張爾岐蓋其闡然者矣爾岐諱字稷若號蒿庵以明諸生入本朝順治庚寅當貢太學以病不行其病既困乃口授墓誌生於萬曆壬子七月二十二日歿于康熙丁巳十二月二十八日其所著儀禮鄭註句讀十七卷顧

氏謂使朱子見之。必不僭謝監獄之稱許。至今江浙間為儀禮之學者。稱蒿庵張先生。先生之學。深于漢儒之經。而不沿訓詁。還于宋儒之理。而不襲語錄。其會論學書云。士生今日。欲倡正學于天下。不必多所著述。當以篤志力行為先。蓋聞然君子之自得者也。惜其學辨五篇。僅存辨志一篇。然已足以見其學之正。其所為文。處士前川府君墓表。將仕佐郎龍溪府君墓表。亡室朱氏權厝志。隻字必謹。而皆得于經之意。夫南豐之作。開朱子先。其亦何必不近之矣。前川府君其祖也。諱蘭。龍溪府君考也。諱行素。為石首驛丞。曾祖諱信。其遠祖諱大倫。明初徙自棗強。其子孝寬。諸生。孫瑞源。曾孫昭木。元孫本碩。來孫克敬。克明。克敬。今轉徙山海關外。以備耕。克明為農于濟陽。年過三十而未娶。嗚呼。崇禎己卯。以石首之罹兵難也。欲蹈水死。欲著道士服入山。以有母之待養也。自抑自制。而不敢遂。蒿庵者。自題其居者也。養其母三十四年。龍溪墓表云。康熙壬子。郭孺人以正月十三日歿。及門艾尚書頤之仙卒。以病自廢。教授其鄉里。守其道。立其言。蓋後其母六年以歿。嗚呼。是則可謂處士也已。其所著易經說畧八卷。詩經說畧五卷。夏小正注一卷。弟子職注一卷。老子說畧二卷。蒿庵集三卷。蒿庵閒話二卷。濟陽縣志九卷。吳氏儀禮注訂誤一卷。春秋傳義未成。山東按察使陸燿既立蒿庵書院于濟南。而復屬載文以表諸墓。嗚呼。濟陽人士。

縣城南二十里荒草寒流杈桹古樹者 大清處士張嵩庵之墓